

## Joaõ

### Deuxu Rybe Wihikỹ Tỹmyra, Joaõ Tyyritidỹỹdu

<sup>1-2</sup> Ibutu aõna aõnakõu, Jesuisi rarehyymy raremyhỹ. Tii rybehyymy raninira. Tii Deuxu-wana ihỹre. Ihãre tahe tii Deuxule rare.

<sup>3</sup> Tii ibutuhukỹlemy riwinyre. Tiiõhyykeki tahe, aõ releõtyhy.

<sup>4</sup> Umytuedeõna wahidỹỹdu tii ihỹre kia-di iny mahãdu rayky ritoosõnymyhỹre ritỹnynymyhỹre wahe. Kia loosõna heka bedede luru ludu loosõna rare.

<sup>5</sup> Bedede luru tỹnyna loosõna rare. Loosõna ròtamyhỹre, bedede luru tahe ròanodỹỹmyhỹre.

<sup>6</sup> Deuxu teõduõ diteõnyde, Joaõ inire.

<sup>7</sup> Tii loosõnamy rarybekremy nade. Kia rybe-di roholamyhỹreki, ibutumy iny rityhynyrenykremy.

<sup>8</sup> Joaõ loosõna aõkõ rare. Urile tuu rarybekemy nade.

<sup>9</sup> Jesuisile loosõnatyhy rare. Tii bedede-õ nadeu, ibutumy iny rayky ritoosõnyre.

<sup>10</sup> Tii bedede-ki raremyhỹ, bedede widỹỹdu rare, ihãre tahe iny rieryõhyre mobo tii ihỹre.

<sup>11</sup> Tasỹ mahãdu-õ dehemynyde, judeu mahãdu-õ wahe. Ihãre tahe ridyõhyre, rityhynyõhyre urile teramy reare.

<sup>12</sup> Iu inyõ Jesuisi rityhynymy ridyreu. Deuxu riõreõlemy risỹdỹỹnyre inimy rityhynyreki. Kia-õ tahe ruru tamy riwahinyre.

13 Kia ityhydỹỹdu tahe Deuxudeewilemy tule iriòreõmy roirekemy. Hãlubu-ribi aõkõ ratybi-enyre, urariribike aõkõ, hãbudeewike aõkõ. Deuxudeewilemy iny ihỹmyhỹrenyre.

14 Rybe tahe umyõ rimyre, demy rexiijenyre, inyyreny-ki rasỹnymyhỹre. Tii tỹxihikỹlemy Deuxu loosõna-di ratximyhỹre, ruxetõena-di inatyhyna-di nade. Inyboho tuu robirenyre. Deuxu Riòre delamy ratximyhỹre, sohojihyyre.

15 Joaõ Jesusimy rarybere kia wese: –Kiamy heka adeereny rarybere. Tii wahewomy kanakre heka waratyre awityhyre. Tii dori wako-ki rarehyymyhỹ waribi juhuutyhy wahe.

16 Inyboho dori sõwemy ruxetõena iribi ritarenyre. Luuna sõwetyhymy tawo-ribi Jesuisi inydeereny diwahinyde.

17 Deuxu bede ywina tahe Moisesi òraru-ki nade inydeereny. Ruxetõenamy tahe inatyhyna Jesuisi Kristu òraru-ki nade.

18 Inyõ heka tiu Deuxumy robiõtyhy. Deuxuriòre delale heka itỹnydỹỹdu rare. Tuunatyhy-di taãxiòti-ki rimyre. Tiile iny-ò Deuxu ditỹnynyde.

19 Judeu mahãdu Jerusalẽ-ribi xiwena wahidỹỹdu mahãduõ diteõnyde Joaõ dỹỹraxidỹỹmy. Levita mahãduõ tule diteõnyde. Tahe roirenyre ritỹỹraxinykemy mobo tii raremy.

20 Tahe Joaõ-ò rỹỹraxirenyre aõhereriwe mobo atxiteri. Joaõ dirawyõnyde inatyhymy rexitxiõnyreri: –Jiarỹ Kristu Deuxu deòdỹỹna aõkõ jiarỹ rare.

21 Tai tahe ixityre tamy rarybere: –Mobo tahe atxiteri, Elia aõbo. Aõkõre, Joaõ rarybere. Tahe

Deuxu dee rybedu atxiteri inyboho riraòrenyleriõ wahe? Joaõ rarybere aõkõremy.

<sup>22</sup> Tamy tahe ixityre raryberenyre: —Wakoreny bedelyyke mobo atxiterimy. Tai iny deòdỹỹdu mahãdu-ò arelyyrenykre. Aõmybo iximy manarybeke?

<sup>23</sup> Tahe Joaõ rarybere: —Jiarỹ Isaia Deuxumy rybedu wesele adeereny ararybekre. Jiarỹ rybeterenaduõ jiarỹ rare. Jiarỹ bederahy-ki iny-ò rarywãhã.

Inynyrỹ-ò ryõ biòbitinyke.

<sup>24</sup> Fariseu mahãdu-ribi kia mahãdu roirenyre.

<sup>25</sup> Tai tamy rarybere: —Kai Kristu aõbo tate? —Aõkõre. Elia aõbo? —Aõkõre. Deuxu dee rybedu aõbo? —Aõkõre. —Aõhereki tahaka iny teratysebenyteri?

<sup>26</sup> Joaõ dirawyònyde: —Jiarỹ bedi iny reratysebenyteri. Inyõ tahe ayrenykile ratxireri. Tii tahe teeryõmahãtenyete.

<sup>27</sup> Tii wahewo-ribi kanakre. Jiarỹ raixỹrumy watxireri iwataana ese-ki, tii waratyrereki.

<sup>28</sup> Kia ibutumy aõhebo rotỹỹnyre Betỹnia hãwã bede-ki. Jordaõ bero kowa weribi ijà-ki ihỹre. Tai iule Joaõ iny riratasybenymyhỹre.

<sup>29</sup> Txubiòwau tahe Jesuisi Joaõ-ò kedehe-mynykemy nade. Tahe rarybere: —Beteheke, kowa Deuxu budoeni naderi. Tii òraru-ribi iny ritakremynade.

<sup>30</sup> Tuu jiarỹ rarybereu, inyõ wahewomy kanakre. Tii waratyre awityhy rare. Tii dori wako-ki rarehyymyhỹ waribi juhuure. Kia rarybereu tule jiarỹ tuurarybemahã.

<sup>31</sup> Reeryõre heka tii, ihãre tahe anade tii ar-itỹnykemy judeu mahãdu-ò. Tai tahe anade iny bedi reratysebenymahãremy.

<sup>32</sup> Tahe Joaõ tamyreny relyyre: –Jiarỹ Deuxu Tytybytyhymy rabire tamy dobehede-ò. Bòtòe wesemy ityre-ò desede.

<sup>33</sup> Deuxu riwateònyre bedi iny ariratysebenykemy. Tahe riwateònyreu tahe wadee rarybere: –Aõmy kai bobikre? Deuxu Tytybytyhy ronymy resekele inyõtyre-ò. Tii sohojile tahe Deuxu Tytybytyhy-di iny riratysebenykre.

<sup>34</sup> Jiarỹ tuu rabire, tai tahe reeryre, tule taheka relyywãhãre, tii inatyhymy Deuxu Riòre raremy.

<sup>35</sup> Itxubiòwau tahe Joaõ taerydỹna inatxiò-wana raremyhỹ.

<sup>36</sup> Tahe Jesuisi nadeò tuu robire. Tahe tamahãdu-ò rarybere: –Kowa tahe Deuxu Budoeni naderi.

<sup>37</sup> Kia rybe-ò tiiboho roholareu, tahe ròirenyre Jesuisi riheludunyrenykremy.

<sup>38</sup> Jesuisi tahe tuu robire ihemy roirerimy. Tahe tamyreny rarybere: –Aõbo teijetenyeri. Tahe dirawyònyde: –Rabi (kia rybe tahe irybereny-ki, erydỹdu rare), titxibo kai tasỹnymahãte.

<sup>39</sup> Jesuisi rirawyònyre: –Bòdòibedenyke betehenykemy. Tahe tii-wana roirenyre, tamy reteherenyre. Tahe txioromy tii-wana ihỹmyhỹ.

<sup>40</sup> Joaõ rybe-ò ijohonaduõ, Jesuisi helududỹduõ, Andre rare. Tii Simaõ Pedro seriòre rare.

<sup>41</sup> Andre tahe taseriòre Simaõ aõwesele rioryre. Tahe tamy rarybere: –Mesia-ki inyboho rahamy

ratximyhÿrenyre. (Ka rybe, Mesia, heka. Kristumy rare, Deuxu deòdÿÿna rare.)

<sup>42</sup> Tahe Andre Jesuisi-ò Simaõ didyde. Jesuisi Simaõ-ò retehere urihimyò idi tamy rarybere: — Kai Simaõ tate, Joaõ riòrere. Iribi tahe ani Sefamy rarekre (Kani heka Pedro rare.)

<sup>43</sup> Itxubiòwau Jesuisi Kalileia-ò rakremy ixi-di rōhōtinyre. Tahe Filipi riijere. Tamy rarybere: — Wahemy manakekō aōbo.

<sup>44</sup> (Filipi tahe Besaida hāwā luduō rare Pedro, Andre-wana ihāwāluduōle rare.)

<sup>45</sup> Filipi tahe Natanaeli witxi reare. Tamy rarybere: — Moisesi bede ywina tyyriti-ki inyōmy rarybere: — Tule Deuxu dee rybedu tyyriti-ki rarybere. Taile rahare. Jesuisi ihÿre. Nazare hāwā luduō rare. Jyje riòre rare.

<sup>46</sup> Tahe Natanaeli ritÿÿraxinyre: — Aōwihikÿ aōkàbo Nazare hāwā-ribi kadòhònykre. Filipi rirawyònyre: — Manake betehékemy.

<sup>47</sup> Jesuisi Natanaelimy robire naderimy tahe tuu rarybere: — Kowa judeu mahāduō inatyhy rare. Tii hābu òbiti rare.

<sup>48</sup> Tahe Natanaeli rarybere: — Timykibo tiwaeryteri. Jesuisi rirawyònyre: — Figueira òra-ki tanyteò, umy rabire. Filipi aòrysomy raòreule, umy rabire.

<sup>49</sup> Natanaeli rimasajuamy rirawyònyre: — Kai Deuxu Riòre tate Inyerydÿÿdu tate. Kai judeu mahādu Iòlò tate.

<sup>50</sup> Jiarÿ adee rarybera: — Figueiraòra-ki umy rabireki. Kiakile aōbo, tiwatyhynyteri. Iratyre aōna aōna wiwihikÿ adee ariteòsinykre.

<sup>51</sup> Inatyhytyhymy adee araybekre: — Biuwetyy

riranykre. Jiarỹ biuloosona hãbu jiarỹ rare. Ỹjuboho Deuxu-ribi wadee doideò kai bobikre. Idi waribi roireò bobikre.

## 2

<sup>1</sup> Inataõ txu-di tỹmyra herina txumy reare. Kana hãwã-ki Kalileia bedeki. Jesusise tai ratximyhỹre.

<sup>2</sup> Jesuisi tule ritobinyre tamy rakremy taerydỹỹna mahãdu-wana.

<sup>3</sup> Lisinaube tya-ki vỹi mona ituere. Tai Jesusise Jesuisi-ò rarybere: –Vỹi mona ituere, imona kõre.

<sup>4</sup> Jesuisi rarybere: –Nadi, aõhebo arotỹỹnykre. Aõka wawidỹỹkõna wabededỹỹnanamy aõkõka bederỹireri.

<sup>5</sup> Tahe Jesusise deòdu mahãdu-ò rarybere: –Anowidỹkỹmy adekereny tiki rarybekeki, ibutumy biwinybenyke.

<sup>6</sup> Debõsohoji reurò mana butxi nihikỹ tai rỹimyhỹ judeu mahãdu ibe-di brebu òraru-ki aõna aõna risuhòmehỹre worana bedehesinau. Mana butxi sohoji sohoji 80 urihixina ratyre rimyre.

<sup>7</sup> Jesuisi tamyreny rarybere: –Ibutumy bedi bitỹxinybenyke. Tahe ibutumy ijà ratyre ritỹxinyrenyre.

<sup>8</sup> Katahe iribi bitake. Worana bedehesi wedu-ò biwybenyke imona. Tahe riwyrenyre.

<sup>9</sup> Kia bee heka Jesuisi riwitxiranyre vỹi monamy. Tahe iwedu riurihire, rieryõre tiribibo nade. Deòdu tahe rieryre juhoo bee rare. Tahe iwedu rarybere weryrybò heridu-ò:

<sup>10</sup> –Katahe awityhyre. Kai ijõ-ribi iwitxiraty-hymy tewinyteri. Ijõ iny heka awityhy iko-ò ritxi-wimyhỹ. Ihewomy tahe awiriòre ritxiwimyhỹre. Kai tahe awityhy ikonana-ò teyrubunya.

<sup>11</sup> Katahe aõna aõna wiwihikỹ iny itxerenamy juhu ludu rare. Kana hãwã-ki Kalileia bedeki ihỹre. Tii tarurutere riteòsinymyhỹre taerydỹỹna mahãdu-ò. Tai ierydỹỹna mahãdu rityhynyre.

<sup>12</sup> Iribi tahe Kafanaõ hãwã-ò Jesuisi dobehede tadi, taseriòre, taerydỹỹna mahãdu tii-wana roirenyre. Ijõtsumy tahe tai bedeki tỹnyna rỹira.

<sup>13</sup> Pascoa worana bedehesi iòhòmỹ rỹireu, Jerusalẽ rotuore kia tahe judeu mahãdu worana bedehesina rare.

<sup>14</sup> Tai Jesuisi Deuxu dohodỹỹna hetowo-ò ralore. Tahe iwo-ki itxi reare sõwemy aõna aõna-di rohonyreriò, broreni-di ijohodu-txi, budoeni-di ijohodu-txi, bòtòe-di ijohodu-txi, tule nieru witxira witxira wibydyỹdu mahãdu-txi reare tai ronymyhỹki.

<sup>15</sup> Jesuisi reroti awaru hãtena wesemy riwinyre. Idi tahe dohodỹỹna hetowo-ribi ibutumy riòlòdỹỹre, budoeni, broreni-wana, tahe nieru wibydyỹdu mahãdu oworubesedyỹ-di Jesuisi rehere, tai nieru rejuxunyre.

<sup>16</sup> Tahe rare bòtòe-di ijohodu-ò. Tamy rarybere: –Biòlòdỹỹnyke wa. Waha heto dori aõ-di ijohona aõkõ rare.

<sup>17</sup> Tahe Jesuisi erydyỹna mahãdu tõhõtiti-txi reare aõbo Deuxu Tyryiti-ki roiretxi:  
–Waha heto yrubudyỹna-ki dori riwasamyhỹre.  
Ariyrubunyky dori watxireri, tai riwasareri.

18 Judeu mahãdu Jesuisi-ò rỹỹraxire: –Aõherekibo kai teòlòdỹỹnyteri. Mobo he arateranyreri tuu biwinykemy.

19 Tahe Jesuisi rirawyònyre: –Deuxusỹ-di behuke tahe inataõ txu-di aditamadỹỹnykre.

20 Tahe judeu mahãdu rarybere: –Ka heto 46 beòra-di relere, timykibo kai inatãõ txu-di biwinykemy.

21 Jesuisi tahe Deuxusỹmy taumylemy rarybere.

22 Iribi tahe iu rubu-ribi iixixana-txi tõhõtireny reare, kia tuu rarybere-txi. Tai heka iritina rityhynyre, tule Jesuisi rybe rityhynyre.

23 Jerusalẽ-ki Jesuisi Pascoa worana bedehesidỹỹna riwyre. Aõna aõna wiwihikỹ inyy-ki ritxienyre riwinyre. Tai sõwemy iny inityhy rityhynyre.

24 Jesuisi tahe urihimyòle iny rityhynyre.

25 Tii dori ibutumy iny rayky rierymyhỹre. Inyõ timy iny raremy tiu tamy aõna relyyõtyhy tii ibutumy aõerydu rareki.

### 3

1 Nikodema fariseu mahãduõ rare. Tii judeu mahãdu weduõ rare.

2 Tii rudimy Jesuisi roramy rara. Tahe tamy rarybere: –Wanyrỹ, reeryrenyre kai Deuxu-ribi erydỹỹdu tate. Inyõ Deuxu-diõkeki tii aõ wiwihikỹ riwinyõtyhy. Iwese aõ wiwihikỹ kai tewinyte wese.

3 Tahe Jesuisi rirawyònyre: –Inatyhytyhymy adee ararybekre: –Inyõ ixityre reakõkeki, tiu Deuxu Òlõnasỹmy robiõtyhy.



4 Nikodema rỹĩraxire: –Timykibo matuari ixityre reakemy. Timyrabo, ixyby tadiwo-ò iny ralòkeki aõbo ixyby iny raumynyke.

5 Tahe Jesuisi rirawyònyre. Inatyhytyhymy rarybere. Inyõ bera-ribi ratybienyõkeki Deuxu Tyytybytyhy-ribi ratybienyõkeki, tiu ralòõtyhy Deuxu Òlòna-ò.

6 Deribi tybie heka dee rare. Deuxu Tyytybytyhy-ribi tybie tasỹ tyytyby rare.

7 Idi wanaòtaõmy aõmybo rarybereridi ixityre ijiranamy.

8 Tiò tiò yhy ribonymyhỹre: –Iwodỹỹ taho-late, tahe tiribibo namyhỹde teeryõmahâte tiòhe ramyhỹre teeryõte, kia wesele iny Deuxu Tyytybytyhy-ribi tybie iny rỹire.

9 Tahe Nikodema rỹĩraxire: –Timyrebohe kia ratxike.

10 Jesuisi dirawyònyde: –Kai judeu bede erysydỹỹdu tate ihãrele teeryõte aõbo.

11 Inatyhytyhymy adee rarybere aõmybo reeryre, aõmybo rabire. Ihãrele tahe kia tetyhynyõte.

12 Bede aõmydỹỹnanamy rarybere tahe tetyhynyõte. Timybo bityhynyke biu aõmydỹỹnanamy ararybekeki.

13 Iny sohojile biu-ò raòwònyre, Deuxu Riòre Hãbutyhyhykỹ rare. Tiile iribi juhu dobehede. (Tiile isỹre. Taile isỹ roire.)

14 Iwese Moisesi bederahy-ki womati hemylala ritamadỹỹnyre wese, Kiawesele jiarỹ, Deuxu Riòre Hãbutyhyhykỹ, wadi kidiwatamadỹỹnykre.

15 Tahe inyõ wadi rityhynykeki, umytuedeòna tuu ritamy rỹihyy rakre.

16 Deuxu Riðre sohojihyyle rare. Deuxu bedede ludu mahãdu ibutumy iluutyhyre. Tai tahe tariðre diteðnyde iny rityhynykremy. Inyõ tii rityhynyre-wana, umytueðnahakỹ ritakre. Tii ru-ruõtyhy rubu bina bede-ò.

17 Deuxu taRiðre bede-ò diteðnyde bedede iny mahãdu tarasadumy rarekemy. Aõ iny ywisidỹna-ò rirutykemy aõkõ.

18 Inyõ rityhynymyhỹreki, tii ywisidỹdu idi rehuõtyhy. Iny rityhynyõmyhỹreki tiihe aõhõkỹmy dỹnana-txi riteðnykremy Deuxu idi ratximyhỹre, tii dori Jesuisi rityhynyõhyymyhỹre, Deuxu Riðre dela wahe.

19 Ibinatyhymy iny aõmydỹnana bedede bedemy rỹira, tai bedede luru-ki rira tamy awira. Tuu loosõna nadeu, tamy ibinare. Tai tahe Deuxu riteðnykemy idi ratximyhỹre.

20 Inyõ aõbinahakỹ rotỹnymyhỹre, loosõna dera heka tuu rỹira; loosõna-ò rehemynyõtyhy, rehemynyre-wana, iny taaõbina bina rierymyhỹre.

21 Iny tahe awiwihikỹle rotỹnymyhỹre-wana tii tahe loosõna-ò rehemynykremy rỹira, taaõmydỹnana dori Deuxudeewimy ririmyhỹre, ibutu iny rierykremy ririre.

22 Iribi tahe Jesuisi taerydỹna mahãdu-wana Judeia bede-ò ròirenyre. Tai heka bededỹnanaõ riwyre. Tiiboho iny ityhydỹdu mahãduõ tai riratysebenyrenyre.

23 Joaõ iribi iòhõmy ratxireri. Iny riratysebenymyhỹre. Tii Eno hãwã-ki Salĩ hãwã-ribi iòhõmy roire. Tai riratysebenyreny sõwemy bee tai roimyhỹreki. Sõwemy iny tamy ratysebenymy rare.

24 (Joaõ iu rotenamy ralõõlemy ratximyhỹ.)

25 Judeu mahãduõ, Joaõ erydỹỹna mahãdu-wana rybetere txiõdỹỹna rõhõnyra, bede ywina õbiti aõmydỹỹnanamy wahe.

26 Tahe Joaõ erydỹỹna Joaõ-ò doidenyde rarybekremy: —Waerydỹỹdureny. Kai hãbumy telyymy tatemahã, kia Jordaõ kanawe-ribi ijã-ki umy-wana raremyhỹ, tii rõratysebenyreri. Sõwemy iny tamy wirotyre.

27 Tahe Joaõ tamy rarybere: —Kia wadee awire aõ aõkõ iny ritamyhỹre, biu-ribi kanakékile tahe iny aõ ritake.

28 Jiarỹ heka Jesuisi nonanamy iyyymy diwateõnyde wahewo-ribi kanakremy. Jiarỹ tii aõkõ rare. Tii tahe Kristu tyhy rare. Jiarỹ kiamy juhUU rarybewãhãre: —Kia tahe teerytenyte.

29 Inatyhymy tahe hãbumy heridu wesemy Jesuisi rare. Ibutumy iny tuu robikemy tamy wirotyre. Ibiõwa weselemy jiarỹ rare. Tahe irybe-ò raholareu, reysamy rarewãhã.

30 Tai wadee awire iny tii rieryreki, waribi tahe nohõti rosakemy idi watxiwãhãre.

31 Tii biujuxahakỹ-ribi nadeki ibutu ratyremy ratximyhỹre. Bede-ribi jiarỹ anadeki, tahe bede ludu jiarỹ rare, bede aõmydỹỹnanamy rarybewãhãre.

32 Tii rarybere aõmybo roholare, robire, tahe ijõ iny rityhynyõhyyre irybe.

33 Inyõ tahe rityhynykeki, tii tule ijõ-ò rarybere, Deuxu inatyhy rare wahe.

34 Deuxu deõdỹỹna heka irybelemy rarybere Deuxu dori Tatytybytyhy ibutumy tamy

diwahinyde.

<sup>35</sup> Tyby taRiòre luure, tai tahe ibutu aõmydÿÿnana ywisidÿÿmy tamy diwahinymy diteõnyde.

<sup>36</sup> Iny Jesuisi rityhynymyhÿreki, umytuedeõnahakÿ-di iny rÿira. Inyõ tamy ratxiõkeki, tiu umytuedeõna robiõtyhy, Deuxu ykarana dori tii-wana ratximyhÿre.

## 4

<sup>1-4</sup> Inyõ fariseu mahãdu-ò rarybere: –Jesuisi Joaõ-ribi iny sõwemy diratysebenymyhÿde. Sõwemy iny ritamyhÿre ierydÿÿmy. Tahe Jesuisi aõkõ ròratysebedÿÿmyhÿre, ierydÿÿnale tahe riratysebenymyhÿre. Iu Jesuisi kiamy rieryreu tahe, Judeia-ribi rexitare. Roirenyre Kalileia bede-ò ritehemynykemy. Roirenyreu tahe Samaria bededihyyle riòhòrenyde.

<sup>5</sup> Samaria bede hãwãõ-ò tahe ritehemynyre. Sika inire. Ijaò riòresu-ribi iòhòmy ròira, tariòre Jyje-ò riwahinyre wahe. Ijaò behãloo tai rÿimyhÿ.

<sup>6</sup> Txutyeyu tahe Jesuisi elerihynymy ronymyhÿ tatilemy nadeki berysyna werora-ki.

<sup>7</sup> Tahe Samaria mahãdu hãwyyõ dobehede beitzemy. Jesuisi tamy rarybere: –Beõ inihe wadee bidiõke.

<sup>8</sup> Jesuisi erydÿÿna mahãdu tahe juhoo roirenyre hãwã-ò rÿsÿna itxemy. Tai Jesuisi riraõmy ronymyhÿ.

<sup>9</sup> Tahe hãwyy rarybere: –Kai judeu mahãdu tate, jikarÿ samaria mahãdu rare. Anoherekibo wadeke textitènyteri bemomomy. (Judeu mahãdu

Samaria mahãdu-wana wiyomy reaõhyymyhÿre. Widi òludu wesemy rare.)

<sup>10</sup> Tahe Jesuisi rirawyònyre: –Kai heka teeryõhyteri mobo jiarÿ rare wahe. Tule, Deuxu wahisidÿÿna teeryõte. Tiwaeryteriwana kai bedexitòenyke, tahe bee irumy ihÿre adee ariwahinyke.

<sup>11</sup> Hãwyy rarybere: –Wahĩ, timybo bee irumy ihÿre wadeke kanakre. Kai ahynakõre, hãloko heka behekyÿre bee irehere. Timybo bee iru kumy-wana ratxireri.

<sup>12</sup> Kai anobohe inytyby Ijaò ratyrere. Tiki heka behãloko wedu juhuku rare; idi riwahinyre inydekereny. Iribile iritxiòre riõmyhÿre tiki-wana, ibroreni riõmyhÿre.

<sup>13</sup> Jesuisi tahe tarybetyhy-di rarybere: –Inyõ kahãloobemy riõkeki, ixityre bemomomy ruruke.

<sup>14</sup> Jiarÿ bee ariwahinyke. Inyõ tahe kiabemy riõke-wana, tiu bemy tamy umytuedeõnahakÿ riwahinyhyymyhÿre.

<sup>15</sup> Tahe hãwyy rarybere: –Wahĩ bee tuedekõdu ikuny tuu kariõke. Tai kakò kanakõtyhy berysymy.

<sup>16</sup> Tahe Jesuisi rarybere: –Maa hÿny, ahãbu biòryke, tahe manake.

<sup>17</sup> Hãwyy dirawyònyde: –Anokõre, wahãbukõre. Jesuisi rarybere: –Inatyhymy tarybeteri ahãbuõremy.

<sup>18</sup> Kai heka iruyre ahãbu tate. Wijina tahe ahãbu aõkõ rare atÿhibiòwale wahe. Kia tahe inatyhymy tarybeteri.

<sup>19</sup> Wahĩ, wiji tahe arakeryra, kai Deuxu rybeduõ tate.

<sup>20</sup> Wahareny Deuxumy realàmhyhÿre

kahãwãlò-ki. Amahãdu anokõ, tamy tahe Jerusalẽ Deuxu deàlàna rare.

<sup>21</sup> Tahe Jesuisi rarybere: —Lerỹ, warybe bityhynyke. Kanakre itxu kahãwãlò-ki aõkõ, Jerusalẽ-ki aõkõ Waha Deuxu deàlàna rarekre.

<sup>22</sup> Kaiboho aõmybo tealàte teeryõtenyte. Jiarỹboho tahe aõmybo realàre, reeryrenyre, tarasana dori judeu mahãdu-ribi nade.

<sup>23</sup> Kia bededỹnanamy reara. Inyõ Waha Deuxu àlànamy ratximyhỹreki Deuxu Tyytybytyhy-di, inatyhyna-di realàmỹhỹke. Tuu deàlàna mahãdu Deuxu riijemyhỹre.

<sup>24</sup> Deuxu Tyytyby rare: —Tai tahe tudealànadu tatytyby-ki inatyhyna-ki tuu realàmỹhỹre.

<sup>25</sup> Kia tahe jikarỹ rekeryre, Mesia kanakre, Deuxu dekòdỹkỹnamy wahe, Kristu inire. Tiki kanakreku wahe, ibutumy inydekereny anona anonamy relykykre.

<sup>26</sup> Jesuisi rarybere: —Jiarỹ tahe tiire, umy-wana wiji rarybereri wahe.

<sup>27</sup> Tahe Jesuisi erydỹna mahãdu rehemynyre. Hãwyy-wana rarybereriki tahe ribedeòtiidỹnyrenyre. Tahe inyõ tamy rỹraxiõhyyre. Aõmybo tamy rỹraxire, ada aõherekibo tamy rarybereriki.

<sup>28</sup> Iu tahe hãwyy tabutxi ririre, hãwã-ò rara. Tahe tahãwã mahãdu-ò rarybere:

<sup>29</sup> —Bodoibedenyke wahemy. Betehebenykemy hãbu-kò. Tiki wakoku relykyre ibutumy anohebo ratỹkỹnymahãremy. Tiki kòsana Kristu ratxireri. Deuxu dekòdỹkỹna rare.

<sup>30</sup> Hãwã-ribi roirenyre Jesuisi-ò.

31 Iu hãwyy hãwã-ki rareamyhỹreu, tahe ierydỹña Jesuisi-ò rarybere: –Iny erydỹdureny rỹsỹnaõ birỹsỹke.

32 Tahe Jesuisi rarybere: –Warỹsỹnadire wahe. Kaiboho heka kia rỹsỹna teeryõtenyte.

33 Tahe widee raryberenyre: –Inyõ kãaõboka tamy rỹsỹnaõ riwyreri.

34 Jesuisi rarybere: –Wadeòdỹỹdu deewimy ariwinykemy idi watxireri. Kia tahe warỹsỹnare, iaõmysỹdỹỹna arihukemy wahe.

35 Maixõmo butuna inaubiòwa ahãdu-di bidiòrarunybenykremy kaiboho tahõtinytenyteri. Tahe aõkõre adeereny ararybekre. Betehebenyke bedero-ò. Maixõmo redenamy rỹire.

36 Kia maixõmo butudỹỹdu iòwy ritake, tahe umytuedeõnahakỹ-ò iny ributunyre. Tahe wiwanale riwodeysanymyhỹre ibròdỹỹdu ibutudỹỹdu-wana.

37 Iwese inyõ rarybere wese, inatyhy rare. Ijõ tahe ibòròdỹỹdu rare. Iwitxira tahe ibutudỹỹna rare.

38 Jiarỹ kaiboho arateònymahãre. Aõbo tebòrònyõtenyte tahe bibutunyke. Juhuu inyõ raaõmysỹdỹỹre: –Kaiboho tahe iraty temytenyte.

39 Tahe hãwyy òraru-ki sõwemy Samaria hãwã mahãdu rityhynyre. Hãwyy rarybere juhUU: –Tiki wakoku relykyre ibutumy anohebo ratỹkỹnymahãre walananonanamy relykyre. Kia rybe òraru-ki tahe rityhynyrenyre.

40 Samaria hãwã mahãdu tahe Jesuisi-ò rex-itòenyre tii-wana roirekemy. Tahe Jesuisi tii-wana inatxi txumy riwyre.

41 Sõwemy tahe rityhynyre Jesuisi Rybe òraru-ki.

42 Tahe hãwyy-ò rarybere. Wiji tahe arybe òraru-ki aõkõ retyhynyre. Tamy tyhy-ò jiarÿle raholare, tahe reeryre tii bede iny tarasadu tyhymy raremy.

43 Inatxitxu-di tahe Samaria-ribi rare Kalileia bede-ò.

44 Jesusile dori rarybere: –Deuxu rybeduõ uladumy ijirana bede-ki iny rityhynyõhyymhÿ. Tiu tamy wowydynaõ riwahinyõtyhy.

45 Kalileia mahãdu juhoo Jerusalẽ-ò tule roirenyre, worana bedehesi rÿimyhÿraò. Ibutumy aõbo Jesusi riwinyra heka tiiboho reteherenyre. Tai Jesusi tasubede-ò rehemynyre tiiboho awimy ridyrenyre.

46 Tahe ixityre Jesusi rehemynyre Kana hãwã-ò. Juhoo tai bee riwitxiranyre vÿi monamy wahe. Bede dinodu aõmysÿdÿÿdu Kafanaõ-ki rasÿnyre.

47 Jesusi Kana hãwã-ki ratxirerimy hãbu roholareu, tamy rara. Tariòre dori ibinamy roire taheto-ki. Jesusi-ò hãbu rarybere: –Manakekõ aõbo waheto-ò wariòre biteytekemy.

48 Jesusi rirawyònyre: –Kaiboho bede aõmydÿÿnana wiwihikÿ tetehetenyteule tetyhynytenyte.

49 Hãbu heka Jesusi-ò rarybere: –Wanyrÿ, wylemy manake wariòre rurukreko-txi.

50 Jesusi rarybere: –Bòòseke, ariòre dori awimy relera.

51 Tahe tii Jesusi rybe rityhynyra tai ròsere taheto-ò rakemy. Ijõ txu tahe ryro-ki teòdu-wana witxi reare. Tii rarybere: –Ariòre reytera aheto-ile.



<sup>52</sup> Hãbu ritỹỹraxinyre tiubo reytera. Tahe relyyre. Kaule, txutyeu reytera.

<sup>53</sup> Jesuisi rarybereu, kiaule iriõre reytera. Hãbu rieryre. Tai tahe idi ibutumy hãbu sỹmahãdu Jesuisi rityhynyre.

<sup>54</sup> Kia tahe Jesuisi inatxina aõna aõna wiwihikỹ iny itxeranamy riwinyre Kalileia bedeki.

## 5

<sup>1</sup> Iribi tahe judeu mahãdu worana bedehesimy rỹimyhỹ. Tai tahe Jesuisi rare Jerusalẽ-ò.

<sup>2</sup> Hãwãy-ki tahe hãloo ibedỹỹ roimyhỹ budoeni ryijò iõhõ-ki rỹimyhỹ. Beteta inire, hebraika rybe ini rare, judeu rybe wahe. Iruyre iwõtèna ube iwerora-ki rỹire.

<sup>3</sup> Sõwemy webinadu ube-ò wii rotyre, iny ruetà ijõre, iny tiere ijõre, inytibina ijõre.

<sup>4</sup> Tiiboho ýjuõ riraòmyhỹre. Ýju beò rerireu tahe raukỹre. Mobo juhu itxi resekeki tahe, tii reytemyhỹre.

<sup>5</sup> Hãbuõ 38 beòramy ibinamy roimy raremyhỹ.

<sup>6</sup> Jesuisi tamy retehereu, rieryre tiwesebeòrabo ibinamy roimy rare myhỹ. Tahe tamy rarybere: — Kai aõbohe beytekekõ.

<sup>7</sup> Hãbu dirawyònyde: —Aõkõre Wanyrỹ, wawìhedỹỹduõre. Bee rexiukỹnyrau, ijõ wako-ò ralòmyhỹre.

<sup>8</sup> Jesuisi tamy rarybere: —Myikewa, abyre bimyke, mariake.

<sup>9</sup> Aõwesele hãbu rỹimy reare, awimy. Tabyre rimyre tahe rariare. Kia txu tahe sabado txu rare. Kia txu tahe judeu aõmysỹdỹỹna txu aõkõ rare.

10 Tai tahe judeu mahãduõ tamy rarybere: — Abyre-di riraõmy, sabado txu dori òbiti aõkõ rareki.

11 Tahe dirawyònyde: —Wadeytedỹỹdu wadee rarybere wabyre arimykemy.

12 Tahe tamy rỹỹraxire: —Mobo adee rarybere abyre bimykemy idi mariakemy.

13 Tahe hãbu deytedu rieryõre mobo rare. Jesuisi dori dexitade iribi. Sõwemy iny tai rỹimyhỹ.

14 Deuxu dohodỹỹna heto-ki Jesuisi idi hãbu-ki rahara. Tamy rarybere: —Kai teyteta, inatyhy. Tai tahe aòraruna biixãwidinyke, aõbinatyhy aõhe adee rotỹỹnyheny.

15 Hãbu tahe rare. Judeu mahãdu-ò rarybere, mobo teytedỹỹdu raremy, Jesuisi wahe.

16 Tai tahe judeu mahãdu Jesuisi ibinamy rex-idelenymy rarybere, sabado txuu kia riwinyreki.

17 Jesuisi tahe rarybere tamyreny: —Waha, Deuxu aõu raaõmysỹdỹỹre, jiarỹ tulere.

18 Tai tahe sõwemy irubudỹỹmy rurumyhỹre. Sabado txu bede ywina-ribi tii riywinyõre. Tule Jesuisi Deuxu wesemy rexioire, Wahamy dori rarybemyhỹreki.

19 Tai tahe Jesuisi tamyreny rarybere: —Jiarỹ ixi-di aõkõ aõmydỹỹnanamy ratỹỹnymahãre aõbo Waha riwinymyhỹre, jiarỹ tule rewinywãhãre iwe-selemy.

20 Waha Deuxu dori waluure. Aõbo riwinyre wadee riteòsinyre, tai tahe aõruxerahakỹtyhymybo bobibenykre, idi bede biòtiinybenykre.

21 Waha Deuxu dori rubu-ribi iny riixixanymyhỹre. Tai tule jiarỹ iny areixixanyke ixideewikeki.

22-23 Ibutumy iny hitxidỹỹna Waha wadee tuu rarybera, tii dori iny rihitxidỹỹnyõtyhy. Jiarỹle tahe iny ywisidỹỹdumy aròhònykre, tai iwese Deuxu iny riwowydynymyhỹre wesele iny riwawowydynymyhỹkre. Adeereny Deuxu diwateònyde. Tai inyõ riwawowydynyõkeki, tii Deuxu riwowydynyõneri.

24 Inatyhytyhymy adeereny ararybekre. Inyõ warybe roholakeki, wateòdỹỹdu rityhynykeki, tii wijityhyle umytuedeõna ritake, ywisidỹỹduko-ò ròhònyõtyhy, rubu ryribi ròhònyre umy irumy ihỹre ryò iny ralòmehỹre.

25 Inatyhytyhymy adee arelyykre: — Bededỹỹnana-ki kòhòra, bede dỹỹnanamy reara. Tahe rubu mahãdu Deuxu Riòre rybe-ò roholakre. Roholamy rỹikeu tahe irumy rỹike.

26 Tyby dori iumyõnanaõhyyre wese tule iRiòre rare. Umytuedeõna wedu rare.

27 IRiòre heka hitxidỹỹna wedumy relere. Tii dori Deuxu Riòre Hãbutyhyhykỹ tii rare, jiarỹ wahe.

28 Bedeòtiidỹỹõmy tahe bededỹỹnanamy he reare. Rubu mahãdu wabedey-ki warybe-ò roholakre, tai iribi ròhònykre.

29 Ibutumy aõwibo riwinyre mahãdu kedex-ixakre umytuedeõnahakỹ-di. Kia ibinamy riwinymyhỹre mahãdu ywisidỹỹdu-ò rexixakre.

30 Jiarỹ ixi-di aõkõ aõmydỹỹnanamy ratỹỹnywãhãre. Iwese Waha-ò raholare wese iny ywisidỹỹmy aròhònykre. Waywisidỹỹna heka òbiti rare. Wadee wimy aõkõ dori tuu watxiwãhãre. Waha wadeòdudeewimy tuu watxiwãhãre.

31 Iximy ararybekeki, inyõ riwatyhynyõtyhy.

<sup>32</sup> Iwixira heka tuu rarybereri wamy wahe. Reeryre inatyhy raremy.

<sup>33</sup> Kaiboho inywixira teteõnytenyte. Joaõ raty-sebedỹỹdu-ò rỹỹraxikemy ibutumy kia wamy rarybere inatyhy rare jiarỹ inatyhy rare.

<sup>34</sup> Iny wamy rarybemyhỹre, tahe jiarỹle kia rei-jeõhyymahãre inyle rieryõre wamy rybe, wahe. Tahe kiamy adee relyywãhãre kaiboho ritamy rỹikemy.

<sup>35</sup> Joaõ tahe loosõna wesemy raremyhỹ. Tii urihimyò bededỹỹnana ritoosõnymy raremyhỹwesemy tahe kaiboho atximahãtenyte. Idi urihimy-ò teysatenyte iloosõna-di, idi iribi kaiboho terarenyre.

<sup>36</sup> Jiarỹ Waha òraru-ki aõmydỹỹnana wiwihikỹ, rewinyamahãre. Kaheka inatyhymy urihixina rare. Joaõ wamy rarybere ratyre heka kaa roire, Deuxu Waha inatyhymy wadeòdu raremy riteòsinyre.

<sup>37</sup> Waha wadeòdu wamy tule relyyre. Kaiboho irybe-ò taholaõtenyte tule tii tabiõtenyta.

<sup>38</sup> Kaiboho tamy taholaõhyymahãtenyte, tiwaty-hynyõteki, jiarỹ dori iteòdỹỹna rare.

<sup>39</sup> Tyyriti-ò tetehetenyte iwo-ki dori umytuedeõna-ki mahakemy tahõtinytenyte. Ritidỹỹnakile wamy relyymyhỹre.

<sup>40</sup> Ihãrele tahe wadee taõmahãte adeereny umytuedeõna ariwahinykemy.

<sup>41-42</sup> Aõmybo wamy iny rarybemahãkeki, aõ aõkõ rare wadee, jiarỹ dori reeryre Deuxu luuna-di aõkõ atxitenyteri.

<sup>43</sup> Jiarỹ Wahani-di anade, tahe kaiboho ti-

watyhynyõmy wadi ahâte. Inyõ ixideewilemy kanakeki, kaiboho bityhynybenykre.

<sup>44</sup> Tai heka tetyhynyõmahâtenyete. Widee dori kaiboho tewowydynymahâtenyete, tahe Deuxu-ribi wowydyna ritakemy terarenyre, sohojihyyre heka Deuxu.

<sup>45</sup> Kiamy tahe Waha-ò arelyyõkre, Moisesi tahe relyykre. Moisesi bede ywina dori, araròsõnyreny rare.

<sup>46</sup> Inatyhymy Moisesi tetyhynymahâte-wana tule jiarỹ biwatyhynymahâke, wamy dori Moisesi ròratidỹỹre.

<sup>47</sup> Irybe bityhynyõkeki, timybo warybe bityhynyke.

## 6

<sup>1</sup> Iribi tahe Jesuisi Kalileia aho-ki ixbyby reurore, Teberidade ahoniõre.

<sup>2</sup> Tahe sõwemy iny riheludunyre tuu robireki, aõna aõna wiwihikỹ, deytedyỹna wiwihikỹ ro-bireki.

<sup>3</sup> Tahe hãwãlòratyy-ò Jesuisi raòwònyre taery-dỹỹna mahãdu-wana –rorukurenyre tai.

<sup>4</sup> Judeu mahãdu worana bedehesi rexide-lenykemy iòhòre.

<sup>5-6</sup> Tahe Jesuisi retehere inysõwehekỹ-ò, tamy rehemynyre. Tai Filipi-ò riurihimy rarybere: –Tikibo orotxu tamyreny rikiõbranyke riyrenykemy. Jesuisi rierymyhỹre aõbo riwinykremy ratxireri ihãrele tahe Filipi-ò kia rarybere.

<sup>7</sup> Filipi tahe dirawyònyde: –Inyõ sohoji sohoji orotxu yre sohoji riykeki, 200 prata womati nieru

rakahurenyke ihãre rimyõtyhy.

<sup>8</sup> Andre Jesuisi erydỹỹna-ò rare, Simaõ Pedro seriõre rare. Tii tahe Jesuisi-ò rarybere:

<sup>9</sup> –Weryryboõ kaki ihỹmyhỹ. Iruyre cevada orotxu idi ratximyhỹ, utura inatxi. Kia tahe aõ aõkõ rare inysõwe-ò.

<sup>10</sup> Tahe Jesuisi taerydỹỹna-ò rarybere: –Tamy marybebenyke ranyrenykemy asityrekile. Tahe rorukurenyre ibutumy. Hãbu 5000 ronyre ijõ inyõ tahe sõwetyhymy rorukure.

<sup>11</sup> Jesuisi orotxu rimyre. Deuxumy reàlàre, idi tahe tamyreny riwahinyre. Tule utura-wana wiwesele risỹnymy. Tuu rotỹỹnyre. Ibutumy heka ixideewina rirỹsỹrenyrene.

<sup>12</sup> Rihydyrenyreu, Jesuisi rarybere taerydỹỹna mahãdu-ò: –Bibutunybenyke rauhenyra uritere ixinamy itxiwixirenyõkemy idi watxireri. Uritere idi dehurenyõmy.

<sup>13</sup> Tahe ributunyrenyrene iuhe waòinatxi reuròmmy weriri ritỹxinyre orotxu yrere-di.

<sup>14</sup> Jesuisi aõwiihikỹ widỹỹnamy robirenyreu kiamy tahe raryberenyrene. Tii inatyhymy Deuxu Rybedutyhy rare. Juhuu dori tuu rarybere kabede-ò kanakemy. Inyboho tii riraòmmyhỹre.

<sup>15</sup> Rõhõtynyrenyrene: –Jesuisi inyiòlòrenymy rikimyrenykre. Tamy ròkòirenykre. Iu Jesuisi kia rieryreu, ixisohojilemy rexitare ixiby, hãwãlò-ò.

<sup>16-17</sup> Ibedesou aho ijà-ò ierydỹỹna mahãdu riberenyrene riraòkemy. Bede rurunyre tahe Jesuisi rehemynyõhyyre. Tai hãwòõ rimyrenyrene idi reuròkemy ijõwe-ribi ijà-ò, Kafanaõ hãwã-ò.

18 Tahe yhy deborehekỹ tiribi tiribi rebonymhỹ. Òbò tahe resemyhỹ.

19 Sohoji urihixina iòhòmy ròireny tahe Jesu- isimy robirenyre. Tii betyredile tamyreny nari- amy nade. Tiiboho ruberunihikỹrenyre.

20 Jesuisi tamyreny rarybere: —Jiarỹle wa rare, breburenyõmyke.

21 Tai tahe hãworo-ò Jesuisi ronykemy tiiboho disỹnydenyde. Aõ wesele tahe rehemynyrenyre tiòbo ròirenyraò.

22 Itxubiòwamy sòwemy iny wii ributunyre aho kanawe-ribi ijà-ki. Hãwò sohojile tahe tai roire aho-ki. Jesuisi erydỹỹna mahãdu roirenyremy ri- eryrenyre. Tahe Jesuisi aõkõ idi rare.

23 Tahe hãwòò dehemynydenyde. Teberiaide hãwã-ribi Jesuisi tai ratximyhỹ iòhò-ò. Tai juhu Jesuisi rexitòdenymy rỹimyhỹ tahe orotxu tamy ri- wahinyre.

24 Jesuisi iõre tai, ierydỹỹna mahãdu iõre. Kia tahe iny sòwemy robirau, hãwò-ò rimyrenyre. Iòrysmy roirenyre, Kafanaõ-ò.

25 Kanawe-ribi ijà-ò rehemynyreu, tii-wana witxi reare. Tahe tamy rỹỹraxire. Waerydỹỹdureny, tiubo kaò tadehemynyte.

26 Aõwiihikỹ rewinyremy aõkõ tiwaijeteny- teri, rỹsỹna adeereny rewahinyrakile, tehydymy terỹsỹtenytakile.

27 Rỹsỹna tyhy ituemyhỹre kiaòle aõkõ maaõmysỹdỹỹbenyke, tahe iwitxira rỹsỹna-ò maaõmysỹdỹỹbenyke, kia ituedeõna-di aõkõ rare. Deuxu Rìòre Habutyhyhykỹ dori adee riwahinykre. Kia rỹsỹna umytuedeõnahakỹ

wesemy rare. Taile tahe Deuxu Waha riwateõnyreri.

<sup>28</sup> Tahe Jesuisi-ò rỹraxire: –Timybo iny Deuxu-deewimy arotỹnyrenykemy.

<sup>29</sup> Jesuisi dirawyõnyde: –Kialemy, biwatyhybenyke: –Deuxu dori wateòdỹdumy rare.

<sup>30</sup> Tahe raryberenyre tamy: –Aõwiihikỹbo inyko-ò biitxeredỹnyke. Aõhebo botỹnykre, iny aratyhynykremy.

<sup>31</sup> Inytybyreny orotxu riyrenyre bederahy-ki. Kia wese Tyyriti-ki roire:

–Moisesi tamy orotxu riwahinyre biu-ribi.

<sup>32</sup> Jesuisi rirawyõnyre: –Inatyhy tyhymy Moisesi aõkõ tamy riwahinyre. Waha dori biu-ribi orotxu tyhy adee riwahinyre.

<sup>33</sup> Deuxu orotxu tahe irutyhymy inydee riwahinymyhỹre, biu-ribi diwahinymyhỹde.

<sup>34</sup> Tahe raryberenyre: –Wanyrỹ, tiu kia orotxu bidiwahinymahãkre.

<sup>35</sup> Jesuisi iximy rarybere: –Jiarỹ orotxu irutyhymy rare. Inyõ wadee kanakeki, tiu rama risaõtyhy. Inyõ riwatyhynykeki, tiu bee risaõtyhy.

<sup>36</sup> Adeereny heka rarybere: –Wamy tabitenyte, ihãrele tiwatyhynyõtenyte.

<sup>37</sup> Ibutumy iny Waha wadee riwahinymyhỹre wadee kanakre. Tiu ixi-ribi ariteõnyõtyhy.

<sup>38</sup> Adobehede dori aõ ixideewimy aõma arotỹnykemy aõkõ. Wadeòdỹdudeewimy arotỹnykemy watxiwãhãre.

<sup>39</sup> Tiu ariõnonyõtyhy wadee diwahinydeò kiaboho ibutumy ikonana txuu rubu-ribi ariixixanykre. Kia tahe wadeòdỹdu deewimy rare.



40 Inatyhymy Waha deewimy kia rare. Iny iRiòremy robireu, rityhynykeu, umy tuedeõna ritake. Ikonana txuu tahe rubu-ribi ariixixanykre.

41 Jesuisi rarybere: —Jiarỹ biu ludu orotxu rare. Tai tahe judeu mahãdu aõbina binahakỹlemy rarybemyhỹre.

42 Kia wese rarybemyhỹre: —Kaa Jesusile rare. Jyje riòre rare. Tyby he ijoi eryna rare ise tule. Aõherekibo tii rarybereri biu-rubu nademy.

43 Tahe Jesuisi dirawyònyde: —Tuu wamy ryberenyõmyke ayludurenymy.

44 Wadeòdỹdu iny wadee rayky-ò rarybemyhỹre namyhỹde. Kia wesele iny wadee kedehemynykre, ikonana txuu tiiboho rubu-ribi ariixixanykre.

45 Deuxu rybedu Tyyriti-ki kia rybe rỹire:

—Deuxu ibutumy iny ribedeerydỹnykre.

Tai tahe Waha-ribi iny rierymy roholamyhỹre, tii tahe wadee rehemynykre.

46 Inyõ Wahamy robiõhyymyhỹre jiarỹle tahe tuu rabimahãre, iribi anadeki.

47 Inatyhytyhymy adee rarybemahãre. Inyõ riwatyhynykeki, umy tuedeõnahakỹ tiiwanale ratxireri.

48 Jiarỹ orotxu wesemy jiarỹ rare. Umytuedeõna wahidỹdu jiarỹ rare.

49 Boreny dori biu-ribi orotxu riyre bederahy-ki. Irabihyy ibutumy tiiboho ituerenyre.

50-51 Jiarỹ tahe biu ludu orotxu wese rare, inyõ tahe kia orotxu riykeki, tiu ruruõtyhy. Waumy ariwahinykre rubu-ò ibutumy iny òraruna òwydỹmy. Tamyreny umytuedeõna riwahinykre

rubu-ò ibutumy iny òraruna òwydỹỹmy. Tamyreny umytuedeõna riwahinykre.

<sup>52</sup> Judeu mahãdu tahe txiõdỹỹna rybemy widee raryberenyre: –Timybo tadelemy inyboho riòwenyrenykemy wahe.

<sup>53</sup> Jesuisi rirawyònyre: –Inatyhytyhymy adee ararybekre. Kaiboho Deuxu Riòre Hãbutyhyhykỹde birõõbenykeki, umytuedeõna bitabenyõtyhy. Ihãlubu biõbenykeki, umytuedeõna-di aõkõ atxitenyteri.

<sup>54</sup> Inyõ waderòdu wahãlubumy momodu tii umytuedeõna-di ratxireri. Tii tahe ikonana txuu rubu-ribi adiixixanykre.

<sup>55</sup> Wade heka juhu irònatyhy rare, wahãlubu tu monatyhy rare.

<sup>56</sup> Inyõ wade rirokeki, wahãlubu riõkeki, wawana tiuhyy ratxireri. Jiarỹ tule tii-wana watxihyyreri.

<sup>57</sup> Waha irumy ratxireri. Tii wadeòdỹỹdu rare iòraru-ki warumy watxireri. Tule waderòdu irumy ratxike waòraru-ki.

<sup>58</sup> Jiarỹ biu ludu orotxu inatyhyjiarỹ rare. Iwese bederahy orotxu heka boreny riyrewesemy aõkõ jiarỹ rare. Ihãrele tahe ituerenyre. Inyõ ri-waykeki, rexisahyymy rarekre.

<sup>59</sup> Kia ibutumy Jesuisi rarybere Kafanaõ judeu dohodỹỹna-ki, rierynanymyhỹreu.

<sup>60</sup> Iribi tahe Jesuisi-ò ijohona mahãdu rarybere: –Kia isira tyhyre iny rieryke. Inyõ heka kia rity-hynyõtyhy.

<sup>61</sup> Jesusile heka rexierymyhỹre tiiboho tuu rarybemyhỹreki, tahe tamy rỹỹraxire: –Kaa aõbohe arabinadỹỹnyrenyke.

62 Tahe jiarỹ Deuxu Riòre Hãbutyhyhykỹ, ixyby biu-ò aròsekeki, timybo marybebenyke, kaiboho wamy bobibenykeki.

63 Deuxu Tyytybytyhyle umytuedeõna riwahinymyhỹre. Umydetyhy umytuedeõna-di aõkõ rare. Urile adee rarybemahãre Deuxu Tyytybytyhymy rybena rare, adeereny umytuedeõna rare.

64 Tahe inyõ ayreny ludu riwatyhynyõreri. Jesuisi tahe juhoo-ribi rierymyhỹre mobo rityhynyõmyhỹre, tule mobo tatxiõdỹỹdumy rarekremy.

65 Jesuisi raryberehymy tii-wana: –Jiarỹ juhoo rarybewãhãre. Inyõ Waha wadee riteõnyõkeki tiu wadee kanaõtyhy. Tai heka tuu adee jiarỹ rarybere.

66 Kia rybe òraru-ki sõwemy taerydỹỹna mahãdu ririrenyre. Tahe roirenyre.

67 Tahe Jesuisi rỹỹraxire taerydỹỹna waðinatxi reurò mahãdu-ò. Ka bexe boibenyõkre aõbo biwaribenyõkre aõbohe.

68 Tahe Simaõ Pedro rirawyõnyre. Wanyrỹ moobo aròirenykre. Kaile heka umytuedeõna rybe-di atxiteri.

69 Jiarỹboho ka aratyhynymahãrenyrene. Araeryrenyrene ka, kai Deuxu-ribi hãbu òbitityhymy atximahãte.

70 Jiarỹ aratarenyrene waðinatxi reurò inymy erydỹỹna mahãdumy. Ihãre tahe inyõ ratximyhỹre diaboõ heka tii rare.

71 Jesuisi tahe Judasi Isariõmy rarybereri. Iwò inatxinamy wahe. Simaõ-Isariõ riòre tii rare. Judasi dori Jesuisi riwahinykremy ratxireri iòludu

mahãdu-ò.

## 7

<sup>1</sup> Judeu mahãdu Jesuisi rubudỹỹmy rurumyhỹre. Tai tahe Judeia bedede ludu hãwã-ò ralòõmyhỹre. Kalileia bedede hãwãdile rariamyhỹre.

<sup>2</sup> Tahe judeu mahãdu worana bedehesi iòhòmy rỹimyhỹ. Kiani tahe heto riòre worana bedehesi rare.

<sup>3</sup> Tahe Jesuisi seriòreboho tamy rarybere: — Make wa karibi Judeia mahãdu bedede-ò aerydỹỹna mahãdu dori aõwihikỹ kai tewinyteò tuu robikemy.

<sup>4</sup> Aõwihikỹmy tewinyteri, tai tahe ixinamy iny tuu ibutumy robikre. Ibutumy iny ixierysomy tahõtinyteri-wana urile iny lau iwòteõmy aõna aõna wihikỹ.

<sup>5</sup> Jesuisi seriòre mahãdu tule rityhynyõre.

<sup>6</sup> Jesuisi tahe dirawyònyde: — Wiji araõkre wabededỹỹnanamy dori tuu reaõmy ratxireri. Kaiboho tahe adohotalemy bòike.

<sup>7</sup> Bedede ludu mahãdu iny dori aluurenyre, tahe waderamy rekoarenyre. Iòrarunamy dori jiarỹ tamy rarybemahãre, ibinatyhyremy.

<sup>8</sup> Kaiboho boibenyke worana bedehesi-ò. Jiarỹ tahe wiji araõkre, wabededỹỹnanamy reaõmy doimyhỹde.

<sup>9</sup> Kia tahe Jesuisi tamyreny rarybere. Tahe Kalileia-ribi Jesuisi ròhònyõmy rỹimyhỹre.

<sup>10</sup> Tahe iseriòre roirenyre worana bedehesi-ò. Idi tahe tule tii rare iherenymy itỹnymy aõkõ wahe, wasimy inyõ tuu robiheny.

11 Judeu mahãdu tahe Jesuisi riijemyhÿre worana bedehesi òrake-ò. Rarybemyhÿre: — Titxibo tahe tii ratximyhÿre.

12 Jesuisimy rybe ixitxiòdÿÿna ròhònyre inysòwehekÿy-ki. Inyò heka awimy tuu rarybemyhÿre. Ijõ tahe ibinamy tuu rarybemyhÿre, tii iny itxenadÿÿdu raremy.

13 Inyò tuu rarybeòhyymyhÿre ibutumy ijohonamy judeu mahãdu lau ruberureki.

14 Worana bedehesi tya-ki Jesuisi Deuxu dohodÿÿna heto-ò ralore ribedeerynykemy.

15 Ribedeerynyreu tahe judeu mahãduò ijõ-ò rarybere: —Timykibo he kia ritidÿÿna rierymy tuu rarybemyhÿre. Rierykõ ihãrele iny rierynanymyhÿre.

16 Tahe Jesuisi dirawyònyde: Waerydÿÿna-di aòkõ rebedeeryre, Deuxu wateòdÿÿdu rybe-di wahe.

17 Inyò Deuxudeewimy ratxikeki, tii rierykre aòerydÿÿnabo òbitimy ratxireri. Tii rieryke Deuxu-ribi aòbo rarybereri ada ixi-ribi rarybereri.

18 Iny ixi-ribi rarybekeki, tiile rexiloosònanyke. Tahe iny iteòdÿÿdumy rarybekeki, tii tahe inatyhy rare. Tii inatyhymy òbiti rare.

19 Moisesi adee bede ywina riwahinyre: — Tahe kaibohoò tetyhynyòhyymahãtenyete. Tai tahe aòherekibo biwarubunykyemy atxitenyteri.

20 Tamy inyò dirawyònyde. Kaita itxÿteteri. Inyò ka ararubunykyemy aòkõ ratxireri.

21 Jiarÿ inyò reteytenyete sabado txuu tahe kai-boho wadi bede teòtiinytenyete.

22 Boholake, Moisesi bede ywina arateònyke ariòre ritõtyky aròkemy resynanykemy. (Boboho tahe kia tuu ritelenyre Moisesi aõkõ.) Tahe notyky resyna txu rÿikeki, tuu tewinyte sabado txu hãrele.

23 Kia sabado txu biwinybenykeki Moisesi bede ywina riywinykemy, tahe aõherekibo wadee taykarananyteri hãbu sabado txu reteytenyreki.

24 Aõ òbitimy aõkõ rare, òbitimy tahõtinyterikile. Òbitinale-di maraykynybenyke.

25 Ijõ Jerusalẽ hãwã ludu mahãduõ rarybere:

26 –Kia rarybemy rÿirerile, tii irubudÿÿmy rex-inohõtinyreri. Beteheke. Butumy ijohonanamy kia rarybemyhÿre. Ihãrele taheka inyõ tamy rarybeõhyymyhÿre. Wedu mahãdu rõhõtinymyhÿre: – Ina aõkãbo Kristumy inatyhymy tii rare.

27 Inyboho tahe rierymy hÿre titxiribibo tiò namyhÿde. Kristu Deuxu deòdÿÿna tahe kanakeu, inyõ tahe rieryõtyhy titxiribibo kanake.

28 Jesuisi tahe Deuxu dohodÿÿna heto-ki ribideerynymy hÿreu rarybere: –Kaiboho tiwaerytenynte, titxiribibo anade tule teerytenynte. Tahe wateòdÿÿdu teeryõtenynte. Teròwumy heka jiarÿ anade. Tule tii inatyhytyhymy rare.

29 Iribi jiarÿ anade Tii riwateònyre, tai jiarÿ tii reeryre.

30 Inyõ riijemyhÿ riròtenykemy. Tahe rimyõhyyre ruberureki, ibededÿÿnanamy aõkõ bede rÿireki.

31 Iny sõwehekÿ-ribi sõwemy iny rityhynyre. Tahe inyõ rarybere: –Kristu Deuxu deòdÿÿna iratyre aõna aõna wiwihikÿ riwinykemy tahõtinyteri. Aõkõre, tii dori inatyhymy Kristu rare.

<sup>32</sup> Fariseu mahãdu kia-ò roholareu, tahe wii ributunyre xiwe wahidyỹdu wedu mahãdu-wana. Tahe tiiboho soldadu mahãduõ riteònyrenyre Jesu-isi rimykeny.

<sup>33</sup> Jesuisi tahe tamyreny rarybere: –Urihimyò umyreny-wana watzikre, idi ta aròðekre wateòdỹdu-ò ixyby.

<sup>34</sup> Kiaboho biwaijebenykre, waki mahabenyõtyhy. Titxibo watzireri kia-ò heka bitehemynyõtyhy.

<sup>35</sup> Judeu mahãdu tahe widee rarybere: –Titxiwexe tii rakremy ihỹre, tuu rokobirenyõtyhy tai rakaharenyõtyhy, myỹ rarybemyhỹre wahe: judeukõdu mahãdu bede-ò aõbo rakremy ixi-di ratxireri. Tai ribedeerynykeny, judeu mahãdu-wana rasỹnykremy.

<sup>36</sup> Timybohe rarybere: –Waki mahabenyõtyhy, titxibo watzireri-ò behemyhyõtyhy, myỹ rarybereri.

<sup>37</sup> Ihewotxu worana bedehesi aõnihikỹtyhy rare. Jesuisi iu rexiukỹnyre rarybekemy: –Inyõ bemy risakeki, wadee kanake, riõke.

<sup>38</sup> Inyõ riwatyhynykeki, Tyyritina-ki kia wese rybe rỹire:

–Iwo-ribi benihikỹ iru ròhònyke.

<sup>39</sup> Iu Jesuisi kia rarybereu, Deuxu Tyytybytyhy aõmy dỹỹnanamy rarybere. Iny dori rityhynykeki, iwo-ò Deuxu Tyytybytyhy ralòke. Urile tahe Deuxu Tyytybytyhy riwahinyõmy rỹire. Jesuisi dori ròðseõre biu-ò.

<sup>40</sup> Tahe roholare mahãdu tahe rarybere: –Ka heka hãbu Deuxu Rybedutyhy rare.

41 Ijõ tahe rarybere: –Tii Kristu rare. Ijõ tahe rarybere: –Kristu aõkõ Kalileia bede-ribi dori tii rareri.

42 Tyyritina rybe-ki roire: –Kristu, Davi sÿ-mahãdu ribi kanakremy. Belẽ hãwã-ribi; titxibo Davi rasÿnyre-ribi.

43 Tai tahe wiwese wese aõkõ rõhõtinyrenyre Jesu-isi-di.

44 Inyõ rirõtentykemy ixi-di ratximyhÿ, ihãrele tahe inyõ rimyõhyyre.

45 Tahe soldado mahãdu ròðsemy rare rimyõhyylemy fariseu mahãdu-ò xiwewahidÿÿdu mahãdu wedu-ò. Tahe soldado-ò rÿÿraxirenyre: –Aõherekibo tedyõteri.

46 Tahe dirawyònyde: –Timybo inyõ kowa hãbu wesemy rarybeõhyyre rybe iwitxira wihikÿmy tii rarybere.

47 Tahe fariseu mahãdu rarybere: –Kaiboho aõbo tule araitxenanyrenyra.

48 Inyboho mahãdu reny-ribi moõ rityhynyõhyymyhÿre, fariseu mahãdu wahe, wedu mahãdu wahe.

49 Inyõ rityhynyre, tahe tiiboho Moisesi bede ywina rieryõre tai Deuxu aõhõkÿmydÿÿnana-txi idi rehukre. Aõhõkÿmydÿÿnana-ò ritamadÿÿnykre.

50 Nikodema iyreny-ki ratximyhÿ. Fariseu mahãduõ tii rare, juhoo Jesuisi raraò rare wahe. Tii heka rarybere imahãdu-ò.

51 Juhoo roholamyhÿre aõhebo rotÿÿnyraò wahe idi tahe ibinakeki rirõtentykremy riijemyhÿre. Kia tahe iny bede ywinareny rare.

52-53 Tahe rirawyònyrenyre: –Kai wa tule Kalileia mahãduõ atxiteri. Tyyriti-ò beteheke timybo



rarybereriò: –Kalileia-ribi rybeduõ rònònyõtyhy wahe.

## 8

<sup>1</sup> [Tahe ibutumy he tasỹ-ò reareare. Iu tahe Jesuisi rare Oliveira hãwãlò-ò.

<sup>2</sup> Biura-di tahe dòòsede Deuxu dohodỹna heto-ò ixyby. Sõwemy iny tamy rare; Jesuisi ronyre; ribedeerynyre.

<sup>3</sup> Hãwyyõ ratximyhỹ hãbu witxiraõ-wana wasimy ratximyhỹ. Tahe inywitxiraõ itxireny reare. Tai tahe Deuxu rybe erydỹdu mahãdu fariseu mahãdu-wana hãwyy didyde Jesuisi-ò. Tahe hãwyy-ò rarybere rỹikemy iny sõwehekỹy-ki.

<sup>4</sup> Tahe raryberenyre Jesuisi-ò: –Bede erydu: –Kahãwyy tỹwe rare inyõ itxi reara.

<sup>5</sup> Iny bede ywina Moisesi riwawahinyré tahe rarybere mana-di rurumyhỹkemy. Tahe aõmybo kai mynarybeke.

<sup>6</sup> Tiiboho kiamy rarybere Jesuisi riurihire timybo rarybekemy. Tai tahe ibinamy tamy rarybekemy idi ratxireri. Jesuisi tahe suò resera ròritidỹkremy tebò-di suki riritinyra.

<sup>7</sup> Tahe ritỹraxyhyy ihỹmyhỹ. Tahe Jesuisi rỹire; rarybere: –Inyõ òrarukõmy ratxirerile, tii mana-di juhUU tamy rehukre.

<sup>8</sup> Ixityrele sỹ Jesuisi ròritidỹre suò.

<sup>9</sup> Kia rybe-ò roholarenyre, tahe rexitarenyre sohoji sohojilemy, tarayky dori ribinadỹnyrenyra. Matuari mahãdu tahe juhUU rexitare. Ikonanatyhy dori rare, tahe Jesuisi hãwyywanale tai rỹire.

10 Jesuisi retehere: –Hãwyy sohojilemy ro-bire rỹraxire tamy: –Hãwyy, titxibo mana-di arubudỹỹmy rybedu mahãdu rirahura. Inyõ aõhe arasỹnyõhyra.

11 Tahe dirawyõnyde: –Anokõre, Wahĩ. Tahe Jesuisi rarybere: –Jiarỹ tulere! Mahe, òraruna-txi tahe ixbyby ixẽõmy.]

12 Ixityre Jesuisi rarybere tamy: –Jiarỹ wabede loosõna rare. Inyõ wahemy kanakeki, bedeluru-ki rariaõtyhy. Tii heka loosõna-di tarayky-ki rarekre.

13 Tahe fariseu mahãdu tamy rarybere: –Aõkõre, kai wa iximy tarybeteri tai tahe arybe inatyhymy aõkõ rare.

14 Jesuisi dirawyõnyde: –Inatyhymy iximy rarybereri jiarỹ, tahe warybe inatyhy rare, jiarỹ dori reeryre titxiribibo anade, tule tiobo arakre reeryre. Kaiboho tahe kia teeryõtenyte.

15 Kaiboho waywisidỹỹmy tadiòlõnyte, ihãre tahe òbitimy tiwaywinytenyõte tiwaerytenykõteki. Tahe jiarỹ inyõ reywinyõreri.

16 Jiarỹ inyõ ariwinykeki, waywisidỹỹna tahe òbiti rare. Jiarỹ dori ixiwanale aõkõ rare. Waha, wadeòdỹỹdu wawana raremyhỹ.

17 Abede ywina-ki kia rybe riritinymy rỹimyhỹre: –Inatxi hãbumy wiwesehyylemy rarybekeki kia tahe inatyhy rare.

18 Jiarỹ iximy rarybemahãre tule Waha wadeòdỹỹdu wamy adeereny rarybemyhỹre.

19 Tahe tiiboho Jesuisi-ò rỹraxirenyre: –Titxibo boo ratximyhỹre. Jesuisi rarybere: –Kaiboho tiwaerykõmahãtenyte, Waha tule teeryõmahãtenyte. Kai biwaerybenyõkeki, tule Waha bierybenyõtyhy.

20 Kia Jesuisi rarybere Deuxu dohodỹña hetowo-ki, iubeweri yrubudỹña ube-ki. Tahe inyõ rimyõhyre, ibededỹñanamy aõkõ bede rỹireki.

21 Iribi tahe ixityre tamy rarybere: –Jiarỹ he arakre karibi. Kaiboho biwaijebenykre tahe aòrarurenydile burubenykre. Boiõtyhy titxibo arakre-ò.

22 Tai tahe judeu mahãdu widee raryberenyre: –Inatyhymy aõbo tii rexirubunykre. Tii raryberaki: –Titxibo arakremy boiõtyhy, myki tuu idi rõhõtinyrenyre.

23 Tahe Jesuisi rarybere: –Kaiboho kaludu toite; jiarỹ aõkõre, biu ludu rare. Kaiboho bede ludu toite, jiarỹ tahe kabede ludu aõkõ jiarỹ rare.

24 Tai heka adeereny rarybereri aòrarureny-di burubenykremy. Inatyhymy jiarỹ tii rare: –Iwese rarybere wesemy. Tahe kia warybe bityhynyõbenykeki, aòrarureny-di burubenykre.

25 Tahe tiiboho rỹrãxirenyre Jesuisi-ò: –Mobo he tate. Jesuisi dirawyõnyde: –Timybo adeereny rarybewãhãre, juhUU wahe.

26 Jiarỹ sõwemy rỹire aõna aõnamy umyreny ararybeke umyreny ariwinyke ta ararybekre Waha tuu wadee rarybelemy. Tii diwateõnyte tii inatyhymy rare. Irybelemy bede iny-ò ararybekre.

27 Rieryõhyyre tamyreny rarybere, tybomy.

28 Kaiboho heka biwatamadỹnybenykreu, bierybenybenykre mobo jiarỹ rare. Tule ixi-ribi aõkõ aõna aõna rewinywãhãre bierybenykre; tule iwese Waha riwaerynanymyhỹre wese, rarybemahãre. Kia tule bierybenykre.

29 Wateòdỹỹdu wawana raremyhỹ. Iximy riwariõtyhy, jiarỹ tamy wimy rewinyhyymahãreki.

30 Kiamy tarybe rahudi tahe, sõwemy iny rityhynyre.

31 Judeu ityhydỹỹdu mahãdu-ò Jesuisi rarybere: —Kaiboho warybe tyhy-di mohõtinybenyhyykeki, inatyhymy watyhydỹỹdu waheludumy boibekre.

32 Inatyhyna tahe bierybenykre. Kia dori aratarenyke, deòdumy aõkõ boibekre.

33 Dirawyònydenyde aõkõre inyboho Abraõ riòkõre roire, tiu heka modeòdumy roirekõmahãre. Timybo tarybeta: —Deòdu-ribi riwatakemy.

34 Tahe Jesuisi tamy rarybere inyõ òraru-di hyy rexiòrarunykeki, tii òraruna deòdu wese hyyle rare.

35 Deòdu heka heto wedu ijoihyymy aõkõ rarekre. Iwedu ixinamy rakre. Riòre tahe ijoihyymy rare.

36 Tahe Deuxu Riòre heka ixinamy arateònykeki, tiu òraruna deòdu wesemy ixyby bonybenyõtyhy.

37 Abraõ riòkõre inatyhymy toite. Kia tahe reeryre. Ihãrele tahe biwarubunybenykemy atxitenyteri warybe dori araykywo-di aõkõ ratxireri.

38 Waha-wana ranymahãu, aõmybo rabire, wiji tuu rarybereri. Kaiboho tule boo-ribi tabitenyete tuu tewinytenyteri.

39 Rirawyònyrenyre: —Wahareny heka Abraõ rare. Jesuisi rarybere: —Abraõ riòremy inatyhymy toite-wana, Abraõ aõmydỹỹnana iwesemy biwinybenyke.

40 Katahe warubudỹỹmy wadi atxitenyteri. Inatyhyna Deuxu-ribi raholaremy, adeereny rarybemahãre, tai tahe warubudỹỹmy

atxitenyteri. Abraõ tahe tiu tahe tuu rotỹỹnyõtyhy.

<sup>41</sup> Kaiboho heka borentytyhy wesele tatỹỹnymahãtenyte. Dirawyõnyde: –Aõkõre, jiarỹboho waxiriõre aõkõ roire. Deuxuhyyle iny tybyreny rare.

<sup>42</sup> Tahe Jesuisi rerawyõnyre: –Deuxu boo inatyhymy rare-wana inihe kaiboho waluurenyre. Jiarỹ dori Deuxu-ribi anade. Ixidee wimy aõkõ anade tii diwateõnyde.

<sup>43</sup> Aõherekibo teerytenyõte warybe. Isiratyhyre aõbo ijohona. Aõkõre, ityhydỹỹ isirare adeereny.

<sup>44</sup> Kaiboho Diabo riõre toite tamywimy biwinykemy atxitenyteri. Tii juhUU rubudỹỹdu hyy rare. Tii heka raruireri inatyhywesehekỹle wahe. Tii ruidu rare. Ruiwedu tii rare.

<sup>45</sup> Kaiboho heka tiwatyhynyõhymahãtenyte inatyhyna dori jiarỹ rarybemahãre.

<sup>46</sup> Inyõ inihe wamy rarybeõtyhy jiarỹ òrarudu raremy. Adeereny inatyhynamy rarybereri. Aõherekibo tiwatyhynyõteri.

<sup>47</sup> Iny Deuxu-ribi ratxireri, Deuxu rybe roholamyhỹre. Kaiboho Deuxuhõrõ aõkõ toite. Teòdu aõkõ toite. Taita warybe-ò taholaõteri.

<sup>48</sup> Jesuisi-ò tiiboho dirawyõnydenyde: –Inatyhymy rarybewãhãrenyde. Kai Samaria mahãdu tate. Kaludu mahãdu aõkõ tate. Kai tyytybybina dire.

<sup>49</sup> Jesuisi rirawyõnyre: –Aõkõre, tyytybybina-di aõkõ watxireri. Waha tahe rewowydynywãhãre. Kaibohole tiwabinadỹỹnymahãtenyte.

<sup>50</sup> Wowydyna ixi-di aõkõ reijereri. Waha tahe kia aõmydỹỹnanamy riywinykre, tii rierymyhỹre.

51 Inatyhytyhymy adee ararybekre: –Inyõ warybemy reòbykeki, tiu rubumy tii robiõtyhy.

52 Tai judeu mahãdu rarybere: –Katahe inatyhymyhe inydeereny aerysydÿÿna rÿira tyytybybina-di tate wahe. Abraõ tahe rurure; Deuxu rybedu tule. Tahe timybo kai tarybeta: –Inyõ warybemy reòbykeki tiu rubu urihixinamy roiõtyhy tamy.

53 Kai aõbo inytybyreny Abraõ ratyre awikemy aõbo ix-di tahõtinyinmahãte. Abraõ rurure Deuxu rybemy rybenadu amahãdu tule rurure. Mobo raremy he tahõtinyinmahãte.

54 Tahe Jesuisi rirawyònyre: –Jiarÿ ix-di wowydyna ariijekeki, tahe wawowydyna aõ aõkõmy rareke. Waha tahe riwawowydynymyhÿke aDeuxumy raremy tu tarybeteri.

55 Tahe aõkõ teeryõtenynte. Jiarÿ tate reerymahãre. Jiarÿ reeryõmahãremy ararybekeki, tai ruidumy rareki, iwese kaiboho toite wesele wahe. Tahe reerywãhãre, tule irybemy reòbymahãre.

56 Boreny Abraõ, wamy dobide, wabededÿÿnana kanakremy tuu dobide, wabededÿÿnana kanakremy tuu dobide tai tahe reysatyhymy rare.

57 Tahe judeu wedu mahãdu rarybere: –Kai 50 beòramy aõkõ atxiteri timyrekibo tarybeta Abraõ tabitemy.

58 Jesuisi dirawyònyde: –Abraõ reaõule, Jiarÿ rarehymahã.

59 Tahe manadile rimymy reserenyre idile rirabunyky. Jesuisi tahe rexiwòmÿ iribi ròhònymy rare, dohodÿÿna heto-ribi.

## 9

<sup>1</sup> Jesuisi rariamy rareu, tii robimy rare hãbu ruetàmy. Tii iruetàhàkỹmy ratohouãmy herinanyre.

<sup>2</sup> Ierydỹỹna mahãdu rỹỹraxire tamy. Erydỹỹdu, aõherekibo hãbu ratohouãnyra iruetymy, ise tyby iòrarudireki aõbo ada taòrarumy aõbo.

<sup>3</sup> Tahe Jesuisi rirawyònyre: —Tahe aõkõre tyby ise-ke aõkõ tiike aõkõ. Deuxu ruru wiji riteòsinykremy tahe tii kiawesemy rohonyre.

<sup>4</sup> Wateòdỹỹdu aõmydỹỹnanamy arotỹỹnyrenykemy watxiwãhãrenyre. Inyboho rikiwinyrenyke ibed-edỹỹnanamy rỹikreu, iwese txumy rỹikre wese tahe rummy heka kanakre tai raaõmysỹdỹỹõmyhỹre.

<sup>5</sup> Kabede-ki watxiwãhãreòle tahe jiarỹ bede ludu mahãdu loosònatyhymy jiarỹ rare.

<sup>6</sup> Tarybe rahudi tahe rarybexinyre suò idi tahe subororomy ritxienyre. Idi ta hãbu rueyre-ò subororo ritidire.

<sup>7</sup> Tahe hãbu ruetà-ò rarybere: —Make wa bexisuhòke Silòe ahobe-di. Silòemy ninadu heka iny rybe-ki deòdỹỹna wesemy rare. Hãbu tahe rare, risuhore, dòòsede robimy.

<sup>8</sup> Tahe ierydu mahãdu, tuu robire idi itxeredu mahãdu raryberenyre widee: —Kabe hãbu ixitòedỹỹdu rare, nierumy kowa-ki rexitòenymy ronymyhỹrele rare.

<sup>9</sup> Ijõ rarybere tule rare. Ijõ rarybere: —Aõkõre, iwesele tahe iwitxirari.

<sup>10</sup> Rỹỹraxirenyre tamy: —Timykibo arue reytera.

<sup>11</sup> Rirawyònyre: —Hãbuõ Jesuisi inire. Tii tahe suboro borole riwinyra warue-ò ritidire. Tahe wadee rarybera: —Make Silòe ahobe-ò

aõ bisuhòke. Tahe rare, resuhore, tai rabimy watzireri.

<sup>12</sup> Rỹřraxirenyre titxibo tahe tii rara. Rirawyònyra: —Reeryõre.

<sup>13-14</sup> Kia ruedeytena Jesuisi riwinyre sabado txuu, judeu aõmysđdỹřna txu aõkõ. Tahe tiiboho hãbu ridyrenyre fariseu mahãdu-ò.

<sup>15</sup> Ixityre hãbu-ò rỹřraxirenyre: —Timykibo riteytenyra. Tahe rirawyònyre: —Subororole waruetyre-ò ritidira, idi resuhòra, iule tahe retehera.

<sup>16</sup> Tai tahe fariseu mahãdu-ò narybede: —Ka hãbu Deuxu-ribi aõkõ nade. Kakỹny sabadotxu bede ywina riywinyõhyre. Tahe ijõ imahãduõ rarybere: —Hãbu òraruduõ tiu deytenuwihikỹõ kia wesemy riwinyõtyhy. Tai tahe wiribi hitximy raraykynyrenyre.

<sup>17</sup> Tahe ixityre hãbu-ò rỹřraxire: —Tii arue arue riteytenyra: —Tai tahe timybo tuu marybekre. Hãbu rarybere: —Tii Deuxu rybemy rybeduõ rare.

<sup>18</sup> Tahe judeu mahãduõ rarybere: —Ise-wana tybywana widee ararybekekile, arityhynkre. Tai riteònyre tybybohoòrysomy.

<sup>19</sup> Rehemynyreu, tahe tamy rarybere: —Kaa aõbo ariõre rare. Inatyhymy aõbo iruetàmy reare. Timykibo tahe wiji robira.

<sup>20</sup> Tahe tybyboho rirawyònyre. Inatyhymy wariòreny rare. Iruetàlemy ka reare.

<sup>21</sup> Reerykõrenyre timykibo retehera. Irueraynyre dori, reeryõhyre. Tamy marybebenyke. Ibeòra dire ka, iximy relyyleke.

<sup>22-23</sup> Tybyboho ruberumyhỹrenyre judeu mahãdu lau. Judeu mahãdu dori, rarybemyhỹre:



—Inyõ Jesuisimy rarybekeki, tii Kristu Deuxu deòdỹna raremy rarybekeki, tahe dohodỹnawo-ribi riteònykemy idi rỹira. Tai tahe hãbutybyboho kia wesemy raryberenyre. Tii ibeòra dire: —Tamy marybebenyke.

<sup>24</sup> Juhuu iruetàmy raremyhỹò ixityre ròtedỹmy rarybere. Òbiti rybe-di marybeke. Inydeereny tahe ka dori òrarudu rare. Tai tahe Deuxu biwowy-dynyke. Tahe tii rarybere:

<sup>25</sup> —Tii òrarudu rare, reerykõre. Sohoji aõmydỹnana reeryre. Juhuu waruetàle heka reeryre, wiji tahe retehereri.

<sup>26</sup> Tahe ixityre tamy rỹraxyre: —Aõbo tii riwinyre. Timybo arue roire.

<sup>27</sup> Hãbu rarybere: —Adeereny tuu rarybere tahe taholaõhytyenyta. Aõherekibo ixityre ijohonamy tarybetenyteri. Ierydỹnamy boibekemy aõbo atxitenyteri.

<sup>28</sup> Tuu raryberenyre aõbina binalemy. Kai heka iijoiõ atxiteri. Jiarỹboho Moisesi erydỹna jiarỹboho roire.

<sup>29</sup> Deuxu Moisesi-ò rarybemyhỹre. Kiamy reeryreny. Ka hãbumy tahe aõmy raholaõmahãreny, tiludubo rare.

<sup>30</sup> Kia wa riwateytenyra bedeòtiidỹna urenana tii rare. Ihãrele tahe kaiboho teeryõmy tuu tarybetenyteri. Wadee kia ajuedena rare.

<sup>31</sup> Deuxu wa òrarudu igitèdỹna-ò roholaõtyhy. Kia reeryreny. Tahe inyõ Deuxu rityhynykeki tamywimy rỹirakeki, kia-ò Deuxu roholakre.

<sup>32</sup> Bede rexidelenyreu, inyõ roholatyhy iruetàmy raumynyre heka reytere. Inyõ tiu

riwinyõre, wiji tahe diwinyde.

<sup>33</sup> Kia hãbu Deuxu-ribi nokõduõ aõkõkeki tiu aõ riwinyõtyhy.

<sup>34</sup> Tahe fariseu mahãdu aõbinahakỹlemy tuu rarybere: —Kai uladumy teateu, òrarudutyhymy tate. Kai aõmybo biwabedeerynybenykremy aõbo wadireny tahõtinyteri. Tahe riteònyre dohodỹyna heto-ribi. Ihyymy riteònyre.

<sup>35</sup> Kia-ò Jesuisi roholareu hãbu riijere tahe rỹrãxire tuu: —Kai Deuxu Riòre Hãbutyhyhykỹ aõbo tetyhynyte.

<sup>36</sup> Hãbu rarybere: —Mobo tii rare, Wanyrỹ, arityhynykemy watzireri.

<sup>37</sup> Wamy wa tabita, jiarỹleheka watzireri. Adee rarybererile watzireri.

<sup>38</sup> Tahe rarybere: —Wanyrỹ aratyhynyra he. Tahe hãbu Jesuisi riwowydynyre.

<sup>39</sup> Jesuisi rarybehyra: —Jiarỹ anade kabede-ò iny ruetà aritobixidỹnykemy; tule robimyhỹre mahãdu ariruetådỹnykre. Iny òwydỹnyamy anade.

<sup>40</sup> Fariseu iòhòmy iribi rỹimyhỹ roholare irybe-ò. Tahe tamy rỹrãxire. Inatyhykõ aõbo ka jiarỹboho tule waruetàrenyre.

<sup>41</sup> Jesuisi rarybere: —Aruetàmy ahãtenyteki, aòraruna-di aõkõ toite. Tahe tarybetenyte reerywãhã, rabiwãhãre. Tai aòraruhyy-di toite.

## 10

<sup>1</sup> Inatyhytyhymy adeeremy ararybekre: —Inyõ budoeni yrubudỹyna ijòtòbòna-di, ralòõkeki, tii tahe wasidu ixiwatxidỹdumy rare, raòwònymy heka ralòmhyhỹre.

<sup>2</sup> Ijòtòbòna-di ròtedu, tii budoeni-di itxeredutyhy rare.

<sup>3</sup> Iu ijòtòbòna-ò rehemynymyhÿreu, ijòtòbòna ludu tamy riraynymyhÿre. Tule budoeni irybe rierymyhÿre. Sohoji sohoji-ò ininimy tamy ryrymyhÿre, tahe idi ròhònymy ridymyhÿre.

<sup>4</sup> Ihörõ ahana-ò ridyreu, tii iko-ò rÿimy idi ramyhÿre. Riheludunymy idi raremyhÿ rierymyhÿreki irybe.

<sup>5</sup> Budoeni ieryõdu riheludunyõtyhy, irybe riereryõreki. Iny ieryõdu-ribi rahenykre.

<sup>6</sup> Jesuisi tamy kia bedede erna iyyymy relyyre. Tiiboho tahe rieryõhyrenyre timybo ibede erydÿÿnamy rororerimy.

<sup>7</sup> Tahe Jesuisi ritÿnynyre tamyreny: –Jiarÿ budoeni ijòtòbòna wesemy räimahäre.

<sup>8</sup> Ibutumy iny wakõule rehemynyre wasidu ixiwatxidÿÿdumy rÿiramyhÿ. Wabudoeni ityhydÿÿdu wesemy rÿirerimy ihÿre. Tiiboho wasidurybe-ò roholaõhyymyhÿrenyre.

<sup>9</sup> Jiarÿ ijòtòbòna wesemy räiwähäre. Inyõ wamy ralòkeki, tii heka tarasanaõmy rarekre. Iwese wabudoeni ralòmehÿre idi ròhònymyhÿre asi wiwihikÿmy riroximyhÿre wesemy, tule ityhydÿÿdu mahãdu rÿirakre, bedeòbyna wiwihikÿ ritakremy.

<sup>10</sup> Wasidu heka rubudÿÿmy nade, bedehudumy wasimy, jiarÿ tahe anade inyõ umytuedeòna ariwahinykremy, irutyhytyhy wihikÿmy wiji rÿirakremy.

<sup>11</sup> Jiarÿ budoeni-di itxeredu wihikÿ rare. Ihy ta waumy ariwahinykre teròwyrenymy.

<sup>12</sup> Inyõ budoeni-di itxeredumy deòdumy risÿnykeki, tii riwisinanyõtyhy, tii dori budoeni

wedu aõkõ rare, deòdule rareki. Tahe iròdu brebunaõ tamy kanakeki tahe rahenyke iribi, tai ijõ rimyke, ihona tahe raòrunyke.

<sup>13</sup> Deòdu heka rahenyke tii iwedu aõkõ rareki, tii aõmy aõkõ idi röhõtinyinmyhÿre, iòwydimy aõkõ.

<sup>14-15</sup> Jiarÿ heka itxeredu wihikÿ rare wabudoeni riwaerymyhÿre. Jiarÿ tule tii mahãdu reerywãhãre. Waha riwaeryre, tule tii reeryre. Iwesetyhyle wabudoeni-wana wii reerynyre. Iòraru-ki tahe waumy ariwahinykemy idi wãhãre.

<sup>16</sup> Jiarÿ wabudoeniõ-di watxiwãhãre. Aõ kabede-ki aõkõ. Ibutumy aributunykemy idi watxireri. Tai tahe sohoji ijoihyylemy heka roikre. Ibutu-di itxeredumy ararekre.

<sup>17</sup> Tai heka Waha waluure, waumy ariwahinykreki wahe. Ihãrele tahe ixyby idi arexiumydÿÿnykre.

<sup>18</sup> Inyõ heka ixideewiõkeki riwarubunyõtyhy. Arexiwahinykre tamyreny riwarubun- yrenykremy. Ixideewikreu, arexiwahinykre, tule waumy arimymy arexiixixanykre. Waha dori wadee rarybere tii ariwinykremy.

<sup>19</sup> Kia rybe òraru-ki judeu mahãdu rybe rexijeijeinyre.

<sup>20</sup> Sõwemy iny ritxiõnymy rarybere: –Tii tyytybybina-di ratximyhÿre ada raitxÿtemy aõbo ihÿre. Aõherekibo tamy taholamahãtenyte.

<sup>21</sup> Ijõ tahe rarybere: –Aõ tyytybybina-di aõkõ rarybemyhÿre. Tyytybybina aõbo hãbu ruetà riruedÿÿnyõtyhy.

<sup>22</sup> Jerusalẽ hãwã-ki heka beòrahyy rare. Worana bedehesi hetxina Tÿmyradÿÿna rÿire.

23 Salomaõ Ube-ki, Deuxu dohodỹyna heto ubeõ-ki.

24 Jesuisi rariamy ihỹmyhỹ. Tahe judeu mahãdu rirurawonyre itỹraxidỹmy. Tiwese bededỹnananybo nohõtidihy bedede ariwyyrenykre. Kai inatyhymy Kristumy tate-wana, tahe manarybeke itỹnymy.

25 Jesuisi dirawyõnyde: –Rarybere wahe, tahe kaiboho tiwatyhynytenyõhyyte. Inatyhymy ierysomy mohõtinybenykeki, waaõmydỹnana wiwihikỹ rewinyamahãre-di betehebonyke. Wahani-di kia rewinyamahãre.

26 Kaiboho tahe tiwatyhynyõlemahãtenyete, wabudoeni wesemy aõkõ toite.

27 Wabudoeni warybe rierymyhỹre, riwahe-ludunymy hỹre; jiarỹ heka ibutumy wabudoeni reerymahãre.

28 Tamy umytuedeõna rewahinywãhãre tiu heka ruruõtyhy. Inyõ waribi ridyõtyhy.

29 Waha wadee riwahinyre. Tii heka ibuturatyre rare. Inyõ iribi ritaõtyhy.

30 Jiarỹ Waha-wana sohojihyye watxiwãhãre.

31 Ixityre tahe judeu mahãdu mana-di rirubunykre idi rỹire.

32 Tahe Jesuisi tamyreny rarybere: –Jiarỹ sõwemy bedeyõbyna inydee rewinywãhãre Waha ruru-di. Aõðrarukibo biwarubunybonykre.

33 Tahe judeu mahãdu rirawyõnyre: –Kai aõmydỹnana wiwihikỹle tewinyte. Kia òraru-ki aõkõ ijoi adi rỹireri mana-di arubudỹmy Deuxumy binatyhymy tarybeteriki. Kai dori hãbu tate, ihãrele Deuxumy texininiteri.

<sup>34-35</sup> Jesuisi rarybere: –Abede ywina-ki ryberiti rỹire. Deuxu Rybe òbitihyomy raritinomy rỹire. Kiamy: –Jiarỹ rarybere: –Kaiboho Deuxu toite. Deuxu Rybe heka inyõ-ò diteònyde. Kia mahãdu tahe Deuxulemy rininire.

<sup>36</sup> Deuxumy tiiboho rininirenyre-wana, aõherekibo wadee takyarananyteri jiarỹ tule Deuxu Riòrelemy rexininireki. Waha dori, riwatamy diwateònyde. Timykibo kaiboho tarybetenyteri Deuxumy ibinamy jiarỹ rarybererimy

<sup>37-38</sup> Waha-ribi bededòbyna ariwinyõkeki, biwatyhynybenyõtyhy. Tahe ariwinykeki, aõbo rewinyre-wana bityhynybenyke, biwatyhynybenyõke hãrele. Tai tahe bityhynybenomy boibeke jiarỹ Waha-wana wãhãre tule Waha wawana ratximyhỹre.

<sup>39</sup> Kabedeu ixityre riijere Jesuisi rimyky tii rexitamy rexihedỹỹnyre.

<sup>40</sup> Jesuisi ixityre Jordaõ bero kowa weribi-ò reurore. Joaõ juhUU ròsebedỹỹmyhỹò rare. Taile tahe tii raremyhỹ.

<sup>41</sup> Tahe sõwemy iny tamy roirenyre. Tamy rarybere: –Inatyhomy Joaõ bededòby iny itxerenamy riwinyõre. Tahe ibutumy tii Jesuisimy rarybemyhỹre, inatyhy rare.

<sup>42</sup> Sõwemy heka taile Jesuisimy rityhynymyhỹre.

## 11

<sup>1-2</sup> Lazaru ibinamy roimyhỹ Betỹnia hãwã-ki. Marie, Marta-wana iseriòreony rare. JuhUU Marie Jesuisi-wana raremyhỹu, tii Jesuisiwa tyre-ò

tarinalÿnyrehekÿõ ritxiwire, idi tahe tarade-di rirubudÿÿnyre.

<sup>3</sup> Lazaru ibinamy roimyhÿki tahe tiiboho riteònyre Jesuisi-ò rarybekremy: –Wahĩ, abiòwa tyhy binanihikÿmy roireri.

<sup>4</sup> Jesuisi kiamy roholareu rarybere: –Kabinana hãwã Deuxu wowydynamy tamy nade. Tule ri-wawowydynkemy jiarÿ dori Deuxu Riòre rare. Kabinina tahe rubuhyymy aõkõ tamy rÿike.

<sup>5</sup> Jesuisi heka ibutumy iluurenyre, Marta, Marie, Lazaru-wana.

<sup>6</sup> Iu Jesuisi rieryreu Lazaru webinaduna, tahe taile ratximyhÿre, reriãrele inatxixumy.

<sup>7</sup> Iribi tahe rarybere taerydÿÿna mahãdu-ò: –Ròkòirenyke ixyby Judeia bede-ò.

<sup>8</sup> Tahe ierydÿÿna mahãdu tamy rarybere: –Erydÿÿdu aõherekibo ixybynomy tamy tarybeteri judeu mahãdu adi heka riwisÿnymy rÿimyhÿ mana-di arubudÿÿmy.

<sup>9</sup> Jesuisi dirawyònyde: –Txu heka waòinatxi òra bededÿÿnanamy rare. Aõhe inatyhy. Inyõ txumy rariakeki, tiu aõ òraru-ki reseõtyhy loosònamy dori ibutumy robimyhÿre.

<sup>10</sup> Bede lurumy rariakeki tahe, aõ òraru-ki re-seke, loosòna dori ihoõreki wahe.

<sup>11</sup> Tahe ijõmy Jesuisi tamyreny rarybere: –Iny biòwareny rõrõmy roireri. Tamy arakre ariixix-anykremy.

<sup>12</sup> Tahe imahãdu rarybere: –Wanyrÿ tii rõrõmy roireri-wana bohe, reytekre.

<sup>13</sup> Jesuisi heka rarybemyhÿ Lazaru rubumy roirerimy. Tiiboho tahe rõhõninyrenyure urile rõrõmy roirerimy.

14 Tahe Jesuisi ritỹnyntyhyra tamyreny: – Lazaru rurure.

15 Jiarỹ wa aòrarureny-ki wadeysamy watxireri tai watxiòraki. Ka tahe biwatyhynybenykre. Ròkòirenykre tamy.

16 Tome ierydỹỹna mahãduõ rare. Didimomy iniõre. Tamahãduõ rarybere: –Ròkòirenyke, tule tii-wana rukururenykremy.

17 Jesuisi rehemynyreu, Lazaru inaubiòwatxumy hãloo iwòdỹỹwo-ki roimyhỹ.

18 Betỹnia Jerusalẽ hãwã-ribi sohoji urihixinamy roire.

19 Judeu mahãduy-ribi sówemy doidenyde Marta Marieboho wotòenamy, iseriòreny rurureki.

20 Marta Jesuisi kanakre rieryreu, tahe ròhònyre tii-wana witxi reakemy. Marie tahe tahetokile ronymyhỹ.

21 Tahe Jesuisi-ò Marta rarybere: –Wahĩ, kakile atxiberi-wana waseritxòre rurukõhykyra ikuny.

22 Ihãrele tahe rekeryre ibutumy Deuxu-kò bex-itòenykeki, tiki adeke kidiwahinykre.

23 Jesuisi tahe tamy rarybere: –Aseriòre wa rubu-ribi kedexixakre.

24 Tahe Marta rarybere: –Rekeryre jikarỹ ikokunanatxu-ku rubu-ribi rexixakre, ibutumy ixixanatxu-ku.

25 Jesuisi rarybere: –Jiarỹ waixixanadỹỹdu rare, umytuedeõna wahidỹỹdu rare. Inyõ riwatyhynykeki, tii rubu-ki roire hãrele, kedexixakre.

26 Ibutumy irumy roirekeki, tiu rururenyõtyhy, tii dori riwatyhynyreki. Kai aõbohe kia tetyhyny-teri.

27 Tii dirawyònyde: –Kohe, Wahĩ,



aratyhynywãhãre. Kai Kristu tate, Deuxu ritxòretyhy. Deuxu tuu raryberekì, bedè-kò kanatekònyde wahe.

<sup>28</sup> Tahe Marta ròsere Marie taseriòre-ò rarybere: —Inyhĩ rehemynyreri, kai makremy rarybereri.

<sup>29</sup> Kiamy roholareu, tahe, wylemy rỹimy reare tamy rare.

<sup>30</sup> Jesuisi dori hãwã-ò ralòòlemy raremyhỹ Marta tamy raryberekile raremyhỹ.

<sup>31</sup> Tii rỹimy ròhònyreu, judeu mahãdu tuu robire. Tahe riheludunyre, wabede-ò robukremy raresỹny tamy roholare.

<sup>32</sup> Marie rehemynyre Jesuisi-ò. Tahe tii tuu robireu, resere iko-ò, tahe rarybere: —Wahĩ, kaki atxiberi-wana ikuny waseritxòre rurukõhykyra.

<sup>33</sup> Jesuisi Marta ibru-di tule judeu mahãduhi-di retehereu tule tii rabadewonihikỹre.

<sup>34</sup> Iule Jesuisi rỹĩraxire: —Titxiwexe tii te-tiditenyte. Tiiboho rirawyònyre: —Wanyrỹ, manake itxeremy.

<sup>35</sup> Jesuisi tahe rahinyre.

<sup>36</sup> Tai tahe judeu mahãduõ rarybere: —Betehebenyke sòwemy heka tii Lazaru luure.

<sup>37</sup> Ijõ tahe rarybere: —Tii iny ruetà riteytenyre. Aõherekibo Lazaru irumy ratxireriule riteytenyõra.

<sup>38</sup> Jesuisi ixyby tawo-ki bederiòtiinyre. Tahe rariamy rare wabede-ò Lazaru suiwodỹỹwo-ò roire. Mana-di tahe ritxiotòbònyre.

<sup>39</sup> Tahe Jesuisi rarybere: —Mana bitake Marta tahe iseriòre rarybere: —Wahĩ, rarònyreri wahe inakubikòwa txumy dokuri txuu idi rỹira.

<sup>40</sup> Tahe Jesuisi rarybere: –Rarybere taheka, bityhynykeki, Deuxu rurumy bobike.

<sup>41</sup> Tahe mana iribi ritarenyre. Jesuisi retehere biu-ò rexitòenyre: –Umy reâlâmy wahe watzireri kai wadee taholataki.

<sup>42</sup> Wadee taholahyy atxiteri mahâte: –Kia reeryre, kata inysõwehekỹ òraru-ki kiamy rarybera adee, tai tiiboho rityhynyrenykeny wahe, kai ti-wateònyteki.

<sup>43</sup> Kia rexihureu tahe ryryre: –Lazaru, bodohonyke wa ahana-ò.

<sup>44</sup> Kia rurumy roimyhỹ-ribi tahe dòhònyde. Iwa heka tebò-wana widee ritỹtenylemy roimyhỹ. Irati tahe tybese-di ritỹtenymy ihỹmyhỹ. Jesuisi rarybere: –Biesebenyke wa ixinamy rake.

<sup>45</sup> Tahe judeu mahãduy-ribi, Marie Martaboho roraludu mahãdu, aõbo Jesuisi riwinyremy ro-bireu tahe, rityhynyre.

<sup>46</sup> Ijõ tahe fariseu mahãdu-ò roirenyre tamy re-lyykemy aõbo Jesuisi riwinyremy.

<sup>47</sup> Iribi tahe xiwe wahidỹỹdu wedu, fariseu wedu mahãdu-wana heka ywisidỹỹna mahãdu ributunyre. Dohodỹỹna mahãdu wedu heka imahãduni rare. Tahe inyõ rarybere: –Ka hãbu heka aõwiihikỹ sõwemy diwinymyhỹde. Aõhebo he rokotỹỹnyrenykre.

<sup>48</sup> Tiihyyle riwinymy rarekeki, heka ibutumy rityhynykre. Idi tahe Roma hãwã mahãdu soldadu kanakre iny riòlòdỹỹnyke inysỹ rahurenykre.

<sup>49-50</sup> Kaifa imahãduõ rare. Kabeòrau tahe tii ibutu xiwena wahidỹỹdu wedu rare. Tahe tii rarybere: –Kaiboho aõ teeryõhytyente. Hãbuõ tahe rurukre ibutu inydee. Tai tahe ibutu iny itueõtyhy.

<sup>51</sup> Kia heka irayky-ribi aõkõ rõhõnyre. Deuxu irayky-ò ritidire, tii dori xiwena wedu tyhy rare kabeõrau.

<sup>52</sup> Kiamy rarybereu, tahe Jesuisi rubunamy rarybereri. Jesuisi dori ibutumy judeu mahãdu dee rurukre. Tamy sohojile aõkõ rurukre. Tahe sohoji mahãduòle rabutukre Deuxu riòre bede bedemy rÿira mahãdu wahe.

<sup>53</sup> Itxuule tahe Jesuisi rubudÿÿmy rõhõtinyrenyre.

<sup>54</sup> Tai tahe ihãwãy-ki rariaõre, Judeia mahãduy-ki. Tahe iribi rexitare bederahy-ò iòhòmÿ. Hãwãõ-ò heka rare, Efraï heka inire. Taile taery mahãdu-wana ihÿmyhÿ.

<sup>55</sup> Judeu mahãdu worana bedehesi iòhòmÿ rÿimyhÿ Pascoa heka inire. Ritelenykõule heka sõwemy roirenyre Jerusalẽ hãwã-ò, tai rexiywinyrenykemy iwese bede ywina rarybere wese Pascoakomy wahe.

<sup>56</sup> Sõwemy iny Jesuisimy robikemy rÿimyhÿ. Tahe Deuxu dohodÿÿna hetowo-ki widee rarybemyhÿre tahe rarybere: –Kanakre aõbo Jesuisi worana bedehesi-ò.

<sup>57</sup> Xiwena wedu fariseu-wana juhuu inyõ rarybemahãre: –Inyõ Jesuisimy robikeki, tuu wadeereny kanarybekre, tii ramykremy wahe.

## 12

<sup>1</sup> Jesuisi rare Betÿnia hãwã-ò Pascoa worana bedehesi rÿikrekoki. Debõsohoji txumy rauhenymy rÿimyhÿ tamy. Tai heka Lazaru rasÿnymyhÿre rubu-ribi rexixare-ribi wahe.

2 Martaboho tahe rÿsÿna wiutàdàna riwinyrenyre Jesuisideewina. Lazaru Jesuisi-wana riroxikremy rononymhÿ. Tahe Marta tamyreny rÿsÿna riwymyhÿ.

3 Marie tahe sōwemy aderòna lÿnyre-di ratximyhÿ, iòwyhykÿre heka. Tahe tii Jesuisiwatyre ritxiwire idi tahe taradedile risuhore. Heto tahe tÿnyrehekÿlemy roire.

4 Judasi Isariò tule Jesuisi erydÿÿnaõ rare tii tai ratximyhÿ. Tii Jesuisi rityhenykremy tii raremyhÿ ihewo-ribi. Tii tahe rarybere:

5 –Kaa aderòna heka iòwyhykÿ rare. Aõherekibo idi tahonyõte nieru idi bitakemy iny aõkõ mahãdu-ò nieru biwahinykemy.

6 (Judasi heka iny aõkõ mahãdu luu aõkõ rare. Erydÿÿna mahãdu nieru rubudÿÿdu tii rare. Kia nieruõ tahe ixideele ritosinymyhÿre. Tai tahe aderòna òwy ixidee ributunykemy idi ratximyhÿ).

7 Tahe Jesuisi rarybere: –Ixinamy wawatyre ritxiwike, wahãloo-ò waherina heka riryrymy tuu ritxiwireri.

8 Kaiboho heka aõu biwiòhenanymy ahãbenyke iny aõkõ mahãdu awanareny dori rarehyymy rarekre. Jiarÿ tahe kaki aratxihiyyke aõkõ rare.

9 Judeu mahãdu Jesuisi rehemynyneriò roholare. Tahe sōwemy iny tamyreny nade itxeremy. Tule Lazaru-ò itxeremy nade rubu-ribi rexixareki.

10 Tai tahe xiwewahidÿÿdu mahãdu wedu tule Lazaru rubudÿÿmy rarybere.

11 Lazaru òraru-ki dori sōwemy judeu wedu Jesuisi rityhnyre.

12 Itxubiòwau tahe Jesuisi nade Jerusalẽ-ò kia-ò

tahe roholare ibutumy worana bedehesi ludu mahãdu.

<sup>13</sup> Tai tahe roirenyre tii-wana witxi reakemy horeru riwyre ityre-di kanakre. Ryryrenyre Jesusi-ò: —Waiòlòreny, kai arawowydynyneri, kai bedeòbydÿÿdu tateki! Kai Deuxuni-di tateri. Kai judeu Iòlòtyhy tate.

<sup>14</sup> Jesusi nade jumenta riòre tyre-ki, tuu dori ihetxina tyyriti-ki roire wesemy.

<sup>15</sup> Kiamy wahe roire:

—Judeu riòre mahãdu uritere brebuõmy atximahãbeny aiòlòreny dori kanakre jumenta riòre tyre-ki.

<sup>16</sup> Iery mahãdu kia rieryõhyre juhoo.

<sup>17</sup> Iribi tahe tõhõti itxi reare ritidÿÿna hetxina-ki roiremy, Jesusi biu-txi ròðsemy rareu wahe tõhõtireny itxi reare. Tule sõwemy iaõmydÿÿnana rybe hetxina-ki riritinymy rÿimyhÿre. Kia-di tahe idi tõhõtireny reare.

<sup>18</sup> Inyõ itxeredu heka Lazaru ixixanamy relyyre. Tai tule iny sõwemy doidenyde. Kia Jesusi riwinyreò heka roholarenyre.

<sup>19</sup> Tai tahe fariseu mahãdu widee raryberenyre: —Ibutumy ihemy roirenyre. Timyõre, aõhe heka rikisÿnyrenyõtyhy.

<sup>20</sup> Inyõ worana bedehesi-ki grego rybedu mahãduõ ratximyhÿ. Tii tai Deuxu reàlakemy ratximyhÿ. Tii Besaida hãwã ludu-ò Kalileia bede luduõ ratximyhÿ.

<sup>21</sup> Tahe grego rybe mahãdu tamy rarybere: —Wanyrÿ, jiarÿboho, Jesusimy arobikemy watzirenyneri.

<sup>22</sup> Filipi tahe Andre-ko relyyre. Ta wiwana roirenyre Jesuisi-ò.

<sup>23</sup> Jesuisi rarybere: –Aõkõra, Wabededỹnana iõhõra Deuxu Riõre Hãbutyhyhykỹ rubuna-ò, wahe.

<sup>24</sup> Inatyhymy adeereny ararybekre: –Jiarỹ alòbòròna rijuxunymyhỹre wesemy aresekre suò, arurukremy. Aruruõkeki ixiwanahyyle ararekre. Arurukre-wana sõwemy araratynykre.

<sup>25</sup> Inyõ ixiluukeki heka, ruruke. Kabede-ki tahe ixiluuõkeki, tii rexiywinymy umytuedeõna-ò ratxike.

<sup>26</sup> Inyõ wadeòdumy ratximyhỹkeki, tii riwahe-ludunyke. Tai titxibo aratxikeò tii wawana ratximyhỹke. Inyõ wadeòdumy rareke-wana, tii Waha riwowydynykre.

<sup>27</sup> Katahe wabedewonihikỹmy watzireri. Timybo ararybekre, Waha, kia rubu aõmydỹnana-ribi biwatake. My òsana arexitõenykre. Aõkõre, kiaòle heka kabede-ò anade.

<sup>28</sup> Waha, anityhy-ò iny riwowydynykemy watzireri. Iule tahe rybeõ-ò roholarenyre: –Kia rotỹnyre ihãre ta ixityre tuu rotỹnykre.

<sup>29</sup> Tahe iny sõwehekỹ kia rybe-ò roholare. Tahe rarybere: –Biumytxyle rare. Tahe ijõ rarybere. Aõkõre ýju rare.

<sup>30</sup> Tahe Jesuisi rarybere: –Waòraru-ki aõkõ kia rybe rỹireri, aõrarureny-ki, tamy boholabenykemy.

<sup>31</sup> Wiji tahe ywisidỹna kỹnyikre, bedemy iny rỹira mahãdu-ò. Kia mahãdu iòlò, Satanasi, kanahitxidỹkre.

<sup>32</sup> Iu jiarỹ itxeò-ki riwaukokreu, ibutumy iny heka ixidee adiwiutàdànykre riwatyhynykremy.

33 Iu tii kia rarybereu, tarubuna ritÿnynyre timybo rurukre.

34 Iny swehekÿ dirawynyde: –Jiarÿboho raholarenyre bedede ywina-. Tii rarybere: –Tiiemy Kristu rarehyymy rarekre. Timybo kai tarybeteri: –Biwaukokremy. Mobo tahe Deuxu Rire Hbutyhyhykÿmy tuu tarybeteri.

35 Tahe Jesuisi dirawynyde: –Urihimyle loosna awana rariamy ratxireri. Idi atxiteriule idi mariake, bedede luru atxi kanakelau. Iny bedede luruki rariakeki, tiobo rake rieryhyyre.

36 Waloosna atxiteriule, biwatyhynyke waloosnamy, taile waloosna mahdumy boibeke. Kiarybe rahu-di tahe Jesuisi iribi rexitamy rexiwore.

37 Tii swemy bededeiidÿÿna ikoreny-txi riwinyre. Iharele tahe swemy rityhynyre.

38 Kia tahe Isaia tyyriti-ki roire, tahe iwesele tuu rarybere wese wiji rÿira rotÿÿnyre:

–Wanyrÿ, Iny rybe tÿnydÿÿnareneny tiiboho rityhynyhyyre, Deuxu taruru tamy ritesinyreharele rityhynyre.

39 Tai rityhynyhyyre. Isaia, Deuxu rybedu ijmy rritidÿÿre:

40 –Deuxu riruetnyre, irayky riteredÿÿnyre. Tai rieryhyymy robihyymyhÿre. Tiu heka Deuxu rityhynyhyyre. Tiu riteytenyhyyre.

41 Isaia Jesuisi loosnamy robire. Tai tahe tuu rritidÿÿre.

42 Iharele tahe dohodÿÿna mahdu wedule swemy rityhynyre. Urile fariseu mahdu rarukile,

ijõ-ò tuu rarybeõre, dohodỹna mahãduy-ribi riòlòdỹnyheny.

<sup>43</sup> Tiiboho dori Deuxu wowydyna luurenyõre iny-wowydynale luurenyre.

<sup>44</sup> —Iny riwatyhynymyhỹkeki, wadeòdỹdyle ri-tyhynymyhỹre.

<sup>45</sup> Inyõ wamy robikeki, iule wadeòdỹdumy ro-bike.

<sup>46</sup> Jiarỹ loosòna wesemy anade bedè-ò. Tai tahe iny riwatyhynykeki, bedè luru ribi ròhònyke. Tai heka anade.

<sup>47</sup> Inyõ warybe-ò roholake hãrele riywinyõkeki, tahe jiarỹ tii wiji ariywidỹnyõke. Jiarỹ dori tarasaduhyylemy anade.

<sup>48</sup> Inyõ riwatyhynyõkeki, warybe-ò roholaõkeki, ikonana txuu tahe ywisidỹna-ò ralòke, warybe-ò rityhynyõmyhyreki aõhòkỹmy dỹnana-ò heka kia ralokre.

<sup>49</sup> Jiarỹ ixi rayky-ribi aõkõ rarybemahãre. Wahale rybe wadee riwahinymyhỹre. Kia wesele relymahãre.

<sup>50</sup> Deuxu rybe bedè ywina-di diwateònyde umytuedeõna wahidỹna kia rare. Kiale heka reeryre.

## 13

<sup>1-3</sup> Pascoa worana bedehesi txumy txuu rỹre. Tahe Jesuisi rexieryre ixyby tyby-ò ròðsekremy ihỹre, ibededỹnana iòhòmý roireki. Tule rexieryre tyby ibutumy tamy riwahinyremy. Tii tyby-ribi nade tule ixybyle tamy rakemy. Txioro roxinau Jesuisi taerydỹna mahãdu-wana rirox-imyhyreny. Judasi Isariò (Simaõ riòre) taile ratx-



imyhỹ. Juhuu diabo tamy rarybere iruule Jesuisi rityhenykemy.

<sup>4</sup> Jesuisi sōwemy taerydỹỹna mahãdu luure. Tai tahe rỹire, tatytyre ludu ritare òsuròna rimyre, idi rexiwetyataare.

<sup>5</sup> Hynaro-ò bee ritxiwire taerydỹỹna mahãduwaa risuhokremy tahe òsuròna-di tawetya-ki ihỹmyhỹ-di iwa rirubudỹỹnyre.

<sup>6</sup> Tahe Jesuisi rehemynyre Simaõ Pedro-ò, Pedro rarybere: –Aõkõre kai wawareny suròdòõmyke.

<sup>7</sup> Jesuisi rirawyònyre: –Kai heka teeryõte aõherekibo resuhòreri. Ihewo-ribi tahe bierykre.

<sup>8</sup> Pedro rarybere: –Aõkõre, wawa-suròdòdỹỹõmy. Jesuisi rirawyònyre: –Arisuhòõkeki wawanahyy aõkõ mabeke.

<sup>9</sup> Pedro rarybere: –Wawasohojile aõkõ bisuhokre, wadebò warati-wana tule wahe.

<sup>10</sup> Tahe ritỹnynyre Jesuisi; inyõ rõhõre-wana iwale rasuhòke. Iuhe ibutumy tyralemy rỹimyhỹre. Kaiboho yralemy toite. Sohoji tahe aõkõre.

<sup>11</sup> Jesuisi tatyhedỹỹdu rayky rierymyhỹre. Tai tahe rarybera, ibutumy aõkõ tyraremy.

<sup>12</sup> Jesuisi iwasuròdò rexihureu, tatytyre ludu retyynyra roxina-ò ròðsere. Tamyreny rỹỹraxire: –Kaiboho teerytenyte. Aõhebo jiarỹ kia ratỹỹnyra.

<sup>13</sup> Adeereny aritỹnynykre. Kaiboho tiwaninitenyte anyrỹmy, aõhe inatyhy? Aerydỹỹdumy, inatyhy heka jiarỹ rare tahe òbitimy tarybetenyte.

<sup>14</sup> Jiarỹ aerydỹỹdureny anyrỹreny heka awareny resuhore. Tai tahe kaiboho wiwa bisuhòbenykre.

<sup>15</sup> Iwese jiarỹ rexideòsinyre wese kaiboho biwinybenyke.

<sup>16</sup> Inatyhymy adeeremy ararybekre. Deòdu dori tawedu ratyre aõkõ rare. Rybe-ò ijohonadu dori rybedutyhy ratyre aõkõ rare.

<sup>17</sup> Kia warybe teerytenyte. Tahe biwinybenykeki bedeòbynatyhy adeeremy kanakre.

<sup>18</sup> Ibutumy umyreny aõkõ rarybereri jiarỹ araeryrenyre, aratarenyreki, wahe. Rybe tyriti-ki roire kiamy:

—Kia wawana riroximyhỹrele heka riwatyhenykre. Ele elemy tuu rotỹỹnykre.

<sup>19</sup> Wiji rarybereri heka wylemy kia tuu rotỹỹnykre. Tuu rotỹỹnykreule, kaiboho bierybenykre òbitimy raryberé wahe; jiarỹ biwatyhynybenykemy wahe.

<sup>20</sup> Inatyhytyhymy ararybekre: —Inyõ adee aditeònykre. Inyõ tii rityhynymy kididykeki, tii riwadymyhỹre. Inyõ kidiwadykeki wadeòdỹỹdu ridymyhỹre, Deuxu rityhynymyhỹre wahe.

<sup>21</sup> Tahe Jesuisi rabadewonihikỹmy ronymyhỹ. Tahe rarybera: —Iny sohojiõ ayreny-ribi riwatyhenykre.

<sup>22</sup> Tahe wii riijerijerenyre. Mokobo rarekremy rõhõtinyrenyre.

<sup>23</sup> Jiarỹ, Joaõ Jesuisi weribi ranywỹhỹ, tii dori sõwemy waluure.

<sup>24</sup> Tahe Pedro wadee narybewasidi: —Tamy in-ihemy myỹraxike mobo raremy.

<sup>25</sup> Tahe jiarỹ retorunyre: —Wanyrỹ, mowexe ratxireri.

<sup>26</sup> Jesuisi rarybere wadee: —Kia orotxu ituudỹỹ tamy ariwahinykrele tiikre. Tahe Jesuisi orotxu

yre rituunyre idi tahe Judasi Isariò-ò riwahinyre. Tii Simaõ riòre rare.

<sup>27</sup> Tahe Judasi riyre. Iribi tahe Satanasi aõwesele tamy ralore. Jesuisi heka Judasi-ò rarybere: — Aõhebo botỹỹnykre wylemy makre biwinykremy.

<sup>28</sup> Tahe riroximy rỹimyhỹ mahãdu rieryõre aõmybo Jesuisi rarybemyhỹ.

<sup>29</sup> Judasi Isariò dori nieru hyna yrubudỹỹdu heka rare. Tai tahe rõhõtinyrenyre Jesuisi worana bedehesi aõna aõna riwykemy riteõnyre, ada iny aokõdu mahãdu-ò nieruõ riwahinykemy.

<sup>30</sup> Judasi orotxu yre riymy rahudi tahe ròhònymy rare bede lurus-txi.

<sup>31</sup> Judasi ròhònymy rahudi tahe Jesuisi rarybere: —Wiji tahe Deuxu Riòre Hãbutyhyhykỹ loosõnamy iny robimyhỹre tarakywo-ki. Tii heka jiarỹ rare. Deuxu-ò waòraru-ki wowydyna riwahinykre.

<sup>32</sup> Deuxu loosõnamy tahe waki iny robikeki, Deuxu riwatoosònyreri aõwesele ibutumy iny tuu robike.

<sup>33</sup> Waluudu mahãdu wariòre wesemy atximahãtenyte, umywanareny urihimyòle ararekre, idi tahe arakre. Tahe biwaijebenyhãrele waki mahabenyõtyhy. Iwese judeu mahãdu-ò rarybere wesele adeereny ararybekre: —Titxibo arakre-ò kaiboho boibenyõke.

<sup>34</sup> Bede ywina tỹmyra wese adeereny ariwahinykre kiamy wahe: —Wiluurenykemy wahe: —Iwese jiarỹ aluurenyre wese tule kaiboho wiluurenyke.

<sup>35</sup> Wiluurenykeki ibutumy iny rieryrenykre kai waerydỹỹna mahãdumy tate.

<sup>36</sup> Tahe Simaõ Pedro ritỹỹraxinyre: —Wanyrỹ,

titxibo kai makre. Jesuisi dirawyònyde: –Titxibo arakre-ò wiji kaiboho boibenyõke, iribi tahe wahemy bodoikre.

<sup>37</sup> Tahe Pedro rarybere: –Wanyrỹ aõherekibo araõkre wiji ahemy waumy kie aõraru-ki ariwahinykemy watzireri.

<sup>38</sup> Inatyhymy aõbo aumy biwahinykre waõraru-ki. Inatyhytyhymy ararybekre: –Hãnie hãbu robukõule kai biwatxiõnykre inataõmy.

## 14

<sup>1</sup> Kaiboho bedètiidỹỹrenyõmyke bedewona-ki. Kaiboho Deuxu tetyhynytenyte, tai tahe biwatyhynykre.

<sup>2</sup> Wahasỹ-ki sõwemy sỹỹ rỹimyhỹre kialemyre heka tai. Kaweseõkeki adee inatyhymy rarybemahãre. Jiarỹ tahe arakre sỹỹ adeereny ariwinykemy.

<sup>3</sup> Ariwinymy arahudi tahe ixbyle aõrysomy adòðsekre. Tahe aradyrenykre titxibo-txi aratzireriò kaiboho tule matxibenykre.

<sup>4</sup> Kaiboho dori teerytenyte titxibo wasỹry roire.

<sup>5</sup> Tahe Tome rarybere tamy: –Wanyrỹ, titxibo makreò reerykõrenyre. Tai tahe timykibo asỹry reeryrenykre.

<sup>6</sup> Jesuisi dirawyònyde: –Jiarỹ wa ryy rare. Deuxu inatyhyna jiarỹ rare. Umytuedeõna wahidỹỹdu jiarỹ rare. Inyõ waõrarukile Waha dee rakre.

<sup>7</sup> Kaiboho tiwaerytenyte-wana tule Waha teerytenyte. Wiji tyhyule Deuxu teerytenyte, tuu tabitenyte.

8 Idi Filipi rarybere: –Wanyrỹ, boo inydee biteòsinyke, tai tahe awike.

9 Tahe Jesuisi rarybere: –Filipi, sōwemy bededỹỹnana umy-wana rewyre. Ihārele tahe ti-waeryōte. Inyō wadee kanakeki, Wahamy ro-bike. Aōherekibo wadee tarybeta boo wadee biteòsinykemy.

10 Jiarỹ Waha-ki watxiwāhāre tule Waha waki ihỹre. Kia aōbohe tetyhynyōte rarybewāhāre, kia iximy aōkō rarybewāhāre. Waha waki ratximyhy tii taōmydỹỹnanamy rotỹỹnyre waumy-ribi.

11 Waha-ki watxiwāhāre, tule tii waki ihỹre, kia bityhynybenyke. Aōwiihikỹ rewinywāhāre òraru-ki biwatyhynybenyke.

12 Inatyhytyhymy adee ararybekre: –Inyō ri-watyhynykeki, wawesele aōwiihikỹ riwinykre. Tahe watyrealeaō riwinykre. Jiarỹ dori Waha-ò arakre.

13 Tai wanimy aōmy bexitòenybenykeki, tii tahe ariwinykre. Iny Waha-ò wowydyna riwahinykemy idi watxireri, iRiòre wahe jiarỹ rare.

14 Tai aōma wani-ò bexitòenybenykeki, tii tahe riwinykreadeereny.

15 Inyō waluukeki tii wabede ywina riywinytyhyke.

16 Waha-ò arexitòenykre ijō wiòhedỹỹdu adeereny kiditeònykremy waderòwymy. Tii aōu aōu adeereny hyyle rarekre.

17 Tii Deuxu Tyytybytyhy rare. Tii inatyhynamy rieryrenyre, iny bede bede mahādu wahe. Deuxu Tyytybytyhy ixidee ridykemy. Tuu dori robiōtyhy rieryōtyhy. Kaiboho tahe teerytenyte.

Tii dori umywanareny ratximyhÿre, aworeny-ki ratxikremy.

<sup>18</sup> Jiarÿ heka ixisohojimy ararisidÿÿnyõtyhy. Jiarÿle adee adoosekre.

<sup>19</sup> Wijile arurumy arakre bede-ribi. Bede bede mahãdu tiu wamy robiõtyhy. Kaiboho tahe wamy bobilebenykre, jiarÿ dori ixityre rubu-ribi adexixamy ararekre. Tai tahe tule kaiboho rubu-ribi bexixamy boibekre.

<sup>20</sup> Kia txuu kaiboho bierybenykre jiarÿ heka Waha-ki watxiwãhãremy. Kaiboho tasÿ waki ahãtenyte. Jiarÿ tule akireny watxiwãhãre.

<sup>21</sup> Inyõ wabede ywinareny dikeki tahe, riywinykeki, waluudu rare. Waha tule iluukre. Jiarÿ tule iluutyhyre. Tamy tule arexideòsinykre.

<sup>22</sup> Judasi tamy rarybere: (aõ Isariò aõkõ kÿny, iwitxiraõ.) –Wanyrÿ, aõhekremybo wadeereny bedexideòsinykre tahe bede bede ludu mahãdu-ò aõkõ wahe.

<sup>23</sup> Jesuisi rarybere: –Inyõ waluukeki, wabede ywina riywinytyhyke. Waha, heka iluutyhykre. Jiarÿboho tamy adoidenykre tamysÿmy.

<sup>24</sup> Iny waluuõkeki, warybe tiu rityhynyõtyhy. Aõ warybe-di aõkõ heka rarybereri. Waha wadee riwahinyredi heka rarybereri.

<sup>25</sup> Tai arakrekoki tuu rarybereri adeereny.

<sup>26</sup> Tahe Deuxu Tyytybytyhy, awiòhedÿÿdu, tii araerynanykre ibutumy aõna aõnamy. Timybo jiarÿ adeereny raryberemy akananohõtiijaranydenykre.

<sup>27</sup> Ywina adeereny adiwahinykre waywina wahe. Iwese bede bede ludu mahãdu

riwahinymyhÿre wese aõkõ ariwahinykre. Uritere nohõtiyreõmy brebuõmy.

<sup>28</sup> Rarybere dori arakremy tule adoosekremy. Waha waratyre rare. Tamy he arakre. Kaiboho waluukeki, beysabenykre tamy arakreu.

<sup>29</sup> Kaa bede reakoki tuu rarybereri. Tuu reakreu tahe, kaiboho biwatyhynybenykre.

<sup>30</sup> Sõwemy heka adeereny ararybeõkre, bede dinodu dori themynysÿ iòhòmy ihÿre, Satanasi wahe. Tii heka wadee iruruõhyyre, riwateònyõtÿhy.

<sup>31</sup> Jiarÿ Waha luure. Rewinywãhãre aõbo Waha ariwinykemy riwateranymyhÿre. Botamanyke: – Ròkòirenyke.

## 15

<sup>1</sup> Hãjutò òwòna wese wihikÿ jiarÿ rare. Waha tahe bede rade wysydÿÿdu wese rare. Bede òbebure iratyõkeki iò riòòke. Iratydikeki iòsòmo iribi risihere. Tai tahe sòwetyhymy nihikÿmy raratynyke.

<sup>2</sup> Kaiboho bede rade-ò wesemy toite. Warybe-di aòsòmoreny aribireny resihemahãre. Katahe òbitimy toite bederatymy raratynykemy.

<sup>3-4</sup> Kaiboho biwamymy wadi myikre. Iwese bede radeõ raòròomyhÿkeki irulemy rÿikre raratynyke. Aõkõkeki ruruke. Kaiboho iwesele toite. Waki beàrenyõbenymyhÿkeki, tiu Deuxudeewimy atxibenyõtÿhy.

<sup>5</sup> Jiarÿ hãjutò òwòna wese rare. Kaiboho ibede radeò wese toite. Waki beerenybenykeki, jiarÿ aki ararike, tai bederaty wese sòwemy maratynyke. Wahoõkeki tiu aõ biwinybenyõtÿhy.

6 Inyõ waki rariõkeki, iwese iny bede rade rubu-di rahuleke, tii iwesele inyõ rahukre. Juhuu rimyre, idi heòty-ò rehure, tai roomyhÿre.

7 Kaiboho waribi boibenyõkeki, warybe õhõti-ribi rosaõtyhykeki, aõtaxina wadee bexitòenybenykre, tai ibutumy adee ariwahinykre.

8 Iwese bede rade sõwemy raratynymyhÿre wese, kaiboho, aõna aõna wiwihikÿ biwinybenyke Deuxu dee. Kiakeki tahe Deuxu deâlana sõwemy ritakre.

9 Iwese Waha waluure wese jiarÿ aluurenyre waluuna-ribi boibenyõke.

10 Wabede ywina inyõ riywinykeki, tii waluuna-ribi raõtyhy. Iwese Waha bede ywina reywinymyhÿre wese tahe Waha luuna-ribi jiarÿ tiu rahõnyõhyre.

11 Wadeysana awo-ki ratxikemy jiarÿ adi watzireri. Eysana sõwemy mabekemy adi watziwãhã. Tai tahe warybe adee rarybere.

12 Wabede ywina heka kaa rare: –Wiluukemy. Iwese jiarÿ aluure wese wiluurenykemy.

13 Inyõ taery dee rurukeki taluunadireki, tii lunatyhy ijõdire.

14 Kaiboho wadeewi biwinybenykwana tai inatyhymy wabiõwa toite.

15 Tahe aõ wadeòdumy aõkõhe araninirenykre. Kaiboho wabiõwa toite jiarÿ dori Waha-ribi raholare adee tuu relywãhãre.

16 Kaiboho tahe tiwatatenyõhyte, jiarÿ tahe aratarenyre kaiboho boibenykemy. Sõwemy aõna aõna wiwihikÿ botÿÿnybenyke. Tule kia aõna aõnamy tule roihykemy. Tai tahe aõmy Waha-ribi wani-di bexitòenybenykeki, adee riwahinyhy



rareke.

<sup>17</sup> Wiluubenyke: –Kia tahe wabede ywina adeereny adiwahinyde.

<sup>18</sup> Bede ludu iny mahādu eramy reakeki myỹ uritere nohōtiōmy juhūu dori waderamy waluuōre.

<sup>19</sup> Kai bede ludu iny tate-wana iny aluuke, tahe aōkōre. Tai tahe iny eramy reamyhỹre. Bede ludu mahādu ribi jiarỹ aratara. Bede ludu mahādu aōkō tate urenana.

<sup>20</sup> Adee heka rarybere aōmybo. Uritere iribi nohōti lusaōmy kia wahe: –Deòdu tawedu ratyre aōkō rare. Tai wadee aōbina binamy iny rotỹỹnymyhỹre. Adeereny tule aōmy rotỹỹnykremy wahe. Tiibohe warybe riywinyrenykeki, arybe tule tiibohe riywinyrenykre.

<sup>21</sup> Kia tahe adee ratỹỹnymyhỹre wanimy rybe òraru-ki, tiibohe dori wadeòdỹỹna rieryōreki.

<sup>22</sup> Tuu ararybeōre wana inihe tiibohe òrarudiōhyrenyre. Katahe rarybere tai tahe tiibohe rarybeōtyhy rieryōremy.

<sup>23</sup> Inyō waluuōkeki, tule Waha luuōtyhy.

<sup>24</sup> Jiarỹ heka ibutuko-ò wowydyna iitxerenarenymy rewinyōrewana, tiibohe iòrarudiōhyre inihe. Tahe rewinyamahāre, tuu robimyhỹrenyre, ihārele tahe waluuōre tule Waha luuōre.

<sup>25</sup> Kiamy heka rotỹỹnyre bede ywina ritidỹỹna-ki roireki. Tai heka tuu rotỹỹnymyhỹre. Kiamy wahe ritidỹỹna-ki roire:

–Tii heka bede òraru aōkō rare, ihārele tahe iluuōrenyre.

<sup>26</sup> Deuxu Tyytybytyhy adee ariteònykre. Tii,

wiòhedỹỹdu rarekre inatyhynamy rierynanykre. Tahe, tii kedehemynykreu wamy rarybekre.

<sup>27</sup> Tule kaiboho wamy marybebenykre, wawana hyy ahãtenyteki.

## 16

<sup>1</sup> Kiamy adee rarybemahãre òraruna-txi ixẽõkemy.

<sup>2</sup> Tiiboho heka anatakre tohodỹỹna hetowo-ribi. Kobe, bede dỹỹnana iòhòmý kadeakreu inyõ anarubunykeki, kia Deuxudeewimy tuu konohõtinykre. Tii Deuxu wiòhedỹỹdu raremy ixi-di kõnohõtinykre.

<sup>3</sup> Tiiboho Waha rieryõhyymyhỹrenyire tule riwaeryõmyhỹre. Tai tahe kiamy adeeremy rotỹỹnymyhỹrenyire.

<sup>4</sup> Iu adeeremy aõmydỹỹnana kedehemynykre, õhõtireny itxi reake timybo adeeremy relyyretxi. Tiu heka tuu rarybeõhyyre, umywanarenyhyy dori wãhãre.

<sup>5</sup> Katahe arakre wadeòdỹỹdu-ò. Kaiboho bỹỹraxibenykekõ aõbo tiobo arakre-ò.

<sup>6</sup> Kaiboho heka tabedewomy toite kamy rarybereriki.

<sup>7</sup> Ihãrele tahe inatyhymy adeeremy ararybekre: —Adeeremy awikre arakreki wahe. Jiarỹ araõkeki awiòhedỹỹdu, Deuxu Tyytybytyhy kanaõkre. Arakeki tahe tii aditeònykre adeeremy.

<sup>8</sup> Iu kanakreu, tii inydee kiditeòsinykre irayky binadiremy, iòbitina-di aõkõremy, iòrarunadiremy. Deuxu dori òrarudu riywisidỹỹnykre.

<sup>9</sup> Taòraruna ixidee kiditeòsinykre tiiboho riwatyhynyõrenyriki.

10 Tahe ixidee kiditeòsinykre. Jiarỹ iratyre waòbitina direki. Waha-ò dori arakre, wamy bobibenyõtyhykemy.

11 Deuxu ixiywisidỹna ixidee kiditeòsinykre kabede dinodu dee rarybere tii rexihukremy.

12 Jiarỹ heka sõwemy adee ararybekemy watxireri, ibutumy tahe isiramy ixidee boholabenyke.

13 Txiòhe rare. Deuxu Tyytybytyhy kanakreu, inatyhymy adeereny rarybekre inatyhyna-di ibutumy. Tarybe-di tahe rarybeõkre. Deuxu-ribi aõmybo roholaremy tahe rarybekre. Tule timybo aõna aõna rarekremy kanarybekre.

14 Tii waaõmydỹnana adeereny ritỹnynykre. Tai kidiwatoosònanykre.

15 Ibutumy Wahahõrõ heka wahõrõ rare. Tai heka tuu adeereny rarybereri waaõmydỹnana adeereny kiditynynykremy.

16 Urihimyò riòre heka waõkre, idi tahe ixityre wamy bobibenykre.

17 Tahe ijõ ierydỹna mahãduõ widee rarybere: –Timybo tii rarybere: –Urihimyò iõkremy tii rarybereri, tule ixiryre wamy bobibenykre. Tule Waha-ò arakre. Timybo heka rieryrenyõhyre aõmybo rarybera.

18-19 Tiiboho Jesuisi-ò rỹraxyrenykre ratxirenyreri. Tahe Jesuisi rierymyhỹre tuu rỹraxykre. Tahe Jesuisi tamyreny rỹraxyre: –Kaimy ixidee tỹraxytenyteri. Wananamy waòkesenalemy.

20 Inatyhymy adeereny ararybekre: – Iny bede mahãdu urile reysakre, kaiboho

tahe araeryrenyra urile mahinybenykre, birajuabenykre, mabedewobenykre. Idi tahe kaiboho beysabenykre.

<sup>21</sup> Iwese hãwyy ijera iòhòreki, rabedewomyhỹre, taaòhòkỹmydỹnana-di ròhòtinymyhỹre. Idi tahe reamyhỹre. Iu tahe tòhòti rosamyhỹre tohouã tỹmyradile reysamyhỹre.

<sup>22</sup> Iwesele kaiboho mabedewobenykre, ixityre wamy bobebenykreu tahe, kaiboho beysabenykre. Inyõ heka deysana aribireny ritaõtyhy.

<sup>23</sup> Kiatxu tahe uritere watỹraxydỹõmykre inatyhymy adeeremy rarybereri. Waha-ribi aõmy bexitòenybenykeki. Tii adeeremy kidiwahinykre wani òraru-ki.

<sup>24</sup> Tiu heka aõmy texitòenytenyõmahãte wani-di. Bexitòenybenyke, tai bitabenykre. Tai tahe kaiboho beysabenykre.

<sup>25</sup> Ibutumy rybewòtemy adeeremy rarybewãhãre wahe. Idi tahe tuu adeeremy ararybeõkre. Idi tahe itỹnytyhymy Waha aritỹnykykre adeeremy.

<sup>26</sup> Kiatxu tahe bexitòenybenykre wani-di jiarỹ ararybeõkre umyreny Waha-ò.

<sup>27</sup> Waha dori aluurenyre, kaiboho waluurenyreki, Deuxu-ribi anade tetyhynytenyteki.

<sup>28</sup> Waha-ribi anade, bede-ò adehemynyde ihãrele bede-ribi arakremy Waha-ò.

<sup>29</sup> Jesuisi ierydỹna mahãdu rarybere: —Wiji tahe itỹnytyhymy tarybeteri. Rybewòte-di aõkõ tarybeteri.

<sup>30</sup> Kai ibutumy teeryte. Inyõ dỹraxyõmy adee. Kai inatyhymy Deuxu-di tanate. Kia jiarỹboho retyhynyrenyre.

<sup>31</sup> Tahe Jesuisi tamy rỹỹraxire. Inatyhymy wijityhyle tetyhynytenyta.

<sup>32</sup> Wabededỹỹnanamy heka reara. Kaibohoõ sohoji sohojimy tasỹ tasỹ-ò rakre. Biwaribenykre ixi sohojilemy arỹikre. Tahe ixi-wana aõkõ watzikre, Wahawanale arỹikre.

<sup>33</sup> Kaheka aõna aõnamy adeeremy rarybere ywina-di araykyreny-ki boibekre. Bede-ki kaiboho aõhõkỹmy botỹỹnybenykre. Ihãrele beysabenyke, Jiaryỹ heka Deuxu òludu mahãdu-di ròtara.

## 17

<sup>1</sup> Jesuisi rarybemy rahudi tahe retehere biu-ò rarybere: –Waha, wabededỹỹnanamyhe reara. Ariòre watziwãhãre. Wowydyna wadee biwahinyke tai tahe adee wowydyna adee ariwahinykre.

<sup>2</sup> Kai, Waha, ibutumy wadee ruruna tewahinyta iny deòdỹỹnamy. Tai umytuedeõna ariwahinykre biu-ò hedu mahãdu-ò.

<sup>3</sup> Kia heka umytuedeõna rare: –Deuxu inatyhy tate sohojihyy tate. Tii araeryrenykeki tahe eòdỹỹna Jesuisi Kristu rieryrenykeki. Kia umytuedeõna rare tamyreny.

<sup>4</sup> Aõ aõmysỹdỹỹnabo wadee tewahinyte, ibutumy adee rewinyre. Tai heka arawowydynyra kabede-ki.

<sup>5</sup> Iu bede rexidelenyreu umywanahyy rarewãhã. Sõwemy loosõna nihikỹ-di rawãhãre. Tahe wiji, Waha, kia loosõnale ixityre bidiwahinykre umywanahyymy ararekre.

<sup>6</sup> Kai iny mahãduõ wadee tewahinyte bede mahãdu-ribi. Tamyreny umy rarybemahãre. Juhu tiiboho ahõrõ roire. Idi wadee tewahinyte. Tii-boho arybe riywinymyhÿre.

<sup>7</sup> Ibutumy waaõmydÿÿna aribi retamahãre. Kia heka wiji tiiboho rieryrenyra ibutumy aribi nade.

<sup>8</sup> Aõrybebo wadee tewahinytamy tamy rarybemahãre. Tiiboho rityhynyrenyre, rieryrenyre aribi jiarÿ anade, kai wateòdÿÿdu tate.

<sup>9</sup> Iòraru-ki adee rexitòenyre. Tiiboho amahãdu roire. Wadee tewahinyte, bede mahãdu-ò raru-ki aõkõ adee rexitòenyre.

<sup>10</sup> Ibutumy wahõrõ, ahõrõ rare. Tule ahõrõ, wahõrõ rare. Tai heka iny mahãdu riwatoosònanymyhÿre.

<sup>11</sup> Jiarÿ adee arakre tai kaki arareõkre. Tii-boho heka kaki rarirenykre. Tiiboho biyrubunykre, Waha, ani òbiti-di biyrubunykre, wadee tewahinyteki. Tai tahe iraykyreny wiwesehyymy roirekre.

<sup>12</sup> Tiiboho-wana rarewãhãu ani òraru-ki reyrubunymahãre, wadee tewahinyteki. Timy heka reõnonyõhyre ijõ, sohojile tahe reõnonyre. Juhuu dori Ritidÿÿna roire ijõ sohojiõ ariõnonykremy. Ihyy tahe reõnonyre, Judasi Isariò õnodÿÿduhyymy rarekre.

<sup>13</sup> Ka tahe arakre arora-ò. Tii heka inyõ rarybemahãre ibutumy wadeysana iworeny-ò ralõmyhÿkemy.

<sup>14</sup> Jiarÿ arybe tamyreny rewahinymahãre. Bede mahãdu iny dori terarenyre, tiiboho bede mahãdu iny aõkõ roireki. Iwese jiarÿ bede ludu hãbu aõkõ rare wese.

15 Bede-ribi tarasamy aõkõ heka adee rex-itòenyneri. Urile ibina bina widỹỹ-ribi biyrubun-ykemy.

16 Tiiboho tahe wiji ijõ bede wixira ludu roire, iwese jiarỹ rare wese, wahe.

17 Arybe-di tiiboho biòbitinyke, tai ahõrõ mahådumy rarekre. Arybe dori òbitityhy rare.

18 Iwese bede iny-ò tadiwateònyte wesemy, Jiarỹ tiiboho reteònyre bede ludu mahãdu-ò rary-bekremy.

19 Tamyreny xiwena wesemy adee arexiwahinykre. Òbitihyymy ararekre, tai tiiboho òbitihyymy roirekremy inatyhyna-di.

20 Aõ tamy sohojile aõkõ heka rexitòenyneri. Ibutumy kia rityhynymy rỹirakre-ò dori rexitòenyneri.

21 Tai tahe ibutumy wiwese wesemy rõhõtinyrenykre. Iwese, Waha, kai waki atxiteri wesemy tule aki watzireri wesemy tiiboho iny-ki roirekre. Tai bede iny mahãdu rityhynykre ateòdỹỹna watzireri urenana.

22 Kai loosõna wadee tadiwahinyte, tahe tamyreny rewahinyre. Tiiboho sohojihyy weselemy roirekremy, iwese iny sohojihyy rare wesemy.

23 Jiarỹ taireny wãhãre, kai waki ahãte. Tai tahe inyboho butuhyymy rokoirekre. Wii riòbitinymyhỹrenykre. Tai bede mahãdu rierykre tadiwateònyteki. Tule wamahãdu luu tate urenana Waha, iwese waluure wese.

24 Waha, titxibo ararekre, tiiboho wawanahyymy roirekre, wamahãdumy wadee tewahinyteki. Tai tiiboho waloosõnamy robikre. Kai dori bede ihokõule waluure, tahe loosõna

wadee tewahinyte.

<sup>25</sup> Waha òbiti, bede mahãdu araeryõre Jesuisi tahe araeryre. Wamahãdu tule rieryre tadiwateònyte.

<sup>26</sup> Jiarỹ tiiboho reerynanyre ani-di. Ihãre ta arierynanykre. Tai aluuna iwese waki ratxireri wese my taireny rarekre, tule jiarỹ taireny ararekre.

## 18

<sup>1</sup> Jesuisi rexitòenymy rahudi tahe roirenyre taerydỹỹna mahãdu-wana Cedrõ beàwe-ribi kowa ijà-ò heka reuròrenyrene, tahe bederaty oworuro-ò rirònyrenyrene.

<sup>2</sup> Judasi heka Jesuisi tyhedỹỹdu heka ibede rieryre, Jesuisi dori taerydỹỹna mahãdu-di tamy rahyymyhỹre.

<sup>3</sup> Tahe Judasi, soldado mahãduõ tadinodu-wana ributunyrene. Fariseu mahãdu-ribi xiwena wedu wahidỹỹdu-ribi Judasi soldado yrubudỹỹdu mahãdu rihitxinyrene tule xiwena deòdu mahãduõ rihitxinyrene tii-wana rakremy roirenyrene. Tahe tamy ritehemynyrenyrene tòbòra heòty-wana.

<sup>4</sup> Jesuisi rexieryre ibutumy aõmybo tamy kodotỹỹnykre. Tahe iny mahãdu-ò rexidorunyrene. Tahe rỹỹraxire tamy: —Mowe teijetenyteri.

<sup>5</sup> Tahe dirawyònyde: —Jesuisi Nazare hãwã ludu reijereri. Tahe Jesuisi rarybere: —Jiarỹ wa tile rare. Tahe Judasi ityhedỹỹdu tii mahãdu wanale nade.

<sup>6</sup> Jesuisi tamyreny rarybereu, tahe rexilòhòrarienyrene iribi, tahe suòle reserenyrene.

<sup>7</sup> Ixityre Jesuisi tamy rỹỹraxire: —Mowe teijeteri.



8 —Jesuisi Nazare hãwã ludu, tiiboho dirawyònyde. —Rarybera tahe jiarỹ raremy wahe. Tiwajeteri-wana tahe biwadyke urile ixinamy wajoi rirahuke.

9 Kawesemy wahe irybe hitxina wadee tewahinyteõ heka tiu reõnonyõhywãhãre. Jesuisi, kiamy rarybere tamyreny irybe hitxina wesemy ibutumy tuu rotỹnykremy.

10 Tahe Pedro tamaydese ritamy reare tahe xiwena wedu deòdu riwotõmonyre. Malòò heka inire. Pedro Malòò nohõti riorore ruruwe-ribi ludu wahe.

11 Jesuisi rarybere Pedro-ò: —Amaydese biru-tyke. Jiarỹ Waha deewimy aõhebo arotỹnykrekõ aõbo wadi tahõtinyteri. Aõhõkỹmy arotỹnyõkemy aõbo wadi tahõtinyteri.

12 Tahe soldadu, tadinodu-wana, judeu yrubudỹdu-wana Jesuisi rimyre ritaataamy ridyre.

13 Kia beòra Kaifa xiwena wedu tyhy rare. Anasi iriòre labie rare. Tai tahe juhoo Ana-ò ridyre.

14 Kaifa tahe juhoo judeu mahãdu-ò rarybere: —Wiji beòramy hãbuõ iny mahãdu òraru-ki rukremy rahõtinyteri.

15 Simaõ Pedro inyõ-wana rare Jesuisi hewomy. Kia Pedro-wana rare, kia xiwena wedutyhy eryna rare. Tai tahe ralore òtity ijòrore-di.

16 Pedro tahe ahanakile rỹire. Kia Pedro-wana rare. Rohonyre hetowo-ribi hetoijò-di itxeredu-ò rarybere, tahe Pedro ridyre hetowo-ò.

17 Kia ijadòma, heto ijò-di itxeredu rarybere Pedro-ò: —Kai Jesuisi erydỹkỹna mahãdunokõ anobo tate. Tahe Pedro dirawyònyde: —Aõkõre.

18 Tahe soldado yrubudỹỹdu tai rahetòmỹ rỹimyhỹ, heto ludu deòdu mahãdu-wana txutàtà riki. Pedro iyrenykile rỹimyhỹ rahetòmỹ.

19 Tahe xiwena wedu tahe Jesuisi-ò rỹỹraxire. Aõhebohe aerydỹỹna mahãdu-wana tadotỹỹnymahãte. Timybohe tebedeerynymahãte.

20 Tahe Jesuisi ritỹnynyre: —Ibutumy inyko relymahãre iwasimy aõkõ heka relymahãre. Judeu dohodỹỹna hetokile relymahãre Deuxu dohodỹỹna heto-wana. Titxibo judeu mahãdu ributunymyhỹremy relywãhãre.

21 Tai aõherekibo wadeele tỹỹraxiteri. Myỹraxike wadee ijohonadu-ò. Tiiboho ka rieryrenyre aõmybo rarybere.

22 Jesuisi kia rarybereu, soldadu itxereduõ ri-hetenyre. Tahe rarybere: —Tu heka rybeõmyke xiwena wedutyhy-ò.

23 Jesuisi dirawyònyde: —Jiarỹ ibinamy aõmybo rarybera-wana, manarybeke tuu. Aõkõkeki, awimy rarybera-wana aõherekibo tiwahetenyte.

24 Anasi tahe Jesuisi ridykemy riteònyre tataanadihyyle Kaifa-ò, xiwena wedutyhy wahe.

25 Kowa tahe Simaõ Pedro ratximyhỹre rahetòmỹ rỹimyhỹ. Inyõ rỹỹraxire: —Kai aõbo ierydỹỹna mahãduõ tate. Tahe rexitxiõnyre. Jiarỹ ijõ aõkõ rare.

26 Xiwena wedu deòduõ Pedro-ò rỹỹraxire: —Tii heka Pedro ritõhõtiorore ijoiõ rare. Tahe tamy rarybere: —Umy taheka rabire tii-wana bederaty oworuro-ki atximahã-ò.

27 Pedro ixityre rexitxiõnyre. Aõwesele tahe hãnie hãbu robure.

28 Idi tahe Kaifa heto-ribi Jesuisi ridyrenyre ywisidỹna-ò bede dinodu heto-ò rudiulere. Tii-boho rirònyõhyyre brebuna-di rexisunyrenyheny. Rirònyrenykeki, tahe Pascoa worana bedehesi rỹsỹnaõ rirỹsỹõtyhy. Tiiboho dori rõhõtinyre rirònykeki, brebuna raremy.

29 Tahe Pilato ròhònyre tamy rarybekremy: — Tahe Jesuisimy tamy rỹỹraxire kia hãbumy teraju-atenyteri aõhebohe rotỹỹnyra.

30 Tahe dirawyònyde: —Aõbibina binamy rotỹỹnykõhyyra wana inihe aridyrenyõhyyreri.

31 Tahe Pilato rirawyònyre: —Bidyke abede ywina rybe-di biywinyke. Tahe judeu mahãdu rarybere: —Wabede ywina rybe warubudỹỹmy rybe aõkõ rare. Inyõ heka arirubunyrenyõtyhy.

32 Kia rybe tahe Jesuisi rybe wesemy rare. Tii dori iximy rarybere timybo rurukremy. Tai timybo irybe hitxina wesemy raryberemy ibutumy rarekre.

33 Ixityre Pilato ralore ywisidỹỹna-ò Jesuisi-ò rỹỹraxire: —Kai aõbo judeu mahãdu Iòlò tate.

34 Jesuisi ritỹỹraxinyre: —Ỹraxina aõbo ahõrõ rare ada ijõ aõbo wamy kia rarybere.

35 Tahe Pilato rarybere: —Jiarỹ wa judeu mahãdu aõkõ wãhãre. Aõbinatyhmy aõbo he tewinyte. Judeu mahãdu wadee tiwadyte.

36 Jesuisi dirawyònyde: —Waiòlòna hãwã bede ludu aõkõ rare. Waiòlòna kaki ratxikeki wamahãdu wadee raaõbinanyke. Tai tahe judeu mahãdu-ò riwawahinykemy aõkõ watxiwãhãre. Tahe aõkõre kabede ludu aõkõ Waiòlòna rare.

37 Pilato tahe rarybere: —Kai aõbo inatyhy iòlòmý tate. Tahe Jesuisi dirawyònyde: —Kai ka

wamy tarybeta. Kia-ò uludumy anade. Kia-ò anade, inatyhynamy arelyykemy. Inyõ inatyhynamy luukeki warybe-ò roholamyhÿre.

<sup>38</sup> Tahe Pilato rÿÿraxire: –Aõbo inatyhyna rare. Ta rybe rahudi tahe judeu mahãdu-ò rarybekemy rare. Tiu kÿny kahãbu-ki aõ ibinamy tai rahaõhyra.

<sup>39</sup> Inyõ ariteònykemy watxireri kaiboho wadi tõhõtinyhytentyteri ka woranabedehesi-ki. Tahe judeu Iòlò aõbohe ka ribi ariteònykre ywihyyle.

<sup>40</sup> Tahe ixityre ibutumy ryryrenyre: –Kia hãbu aõkõre, Baraba biteònyke (Baraba heka hãbu debore wasidu rare.)

## 19

<sup>1</sup> Idi tahe Pilato Jesusimy rerotiyhyta-di raòhòtekremy soldado mahãdu riteranyre.

<sup>2</sup> Soldado mahãdu edehékÿ rataanadile ira-ò ritidire, iumy tahe tylÿrehekÿ-di rityynyre iòlòtyywesekemy.

<sup>3</sup> Tamy rehemynymyhÿre: –Aõherebo iòlòtyhy wesena, tahe rihetenyrenyre.

<sup>4</sup> Pilato tahe ixityre ròhònymy iny-ò rarybekemy: –Ixityresÿ adeereny redyreri. Bierybenyke. Aõ heka tai ibinaõhyymy idi retehewãhãre.

<sup>5</sup> Tahe Jesuisi ròhònnyre ede rataana-di tylÿrehekÿ-di. Tahe Pilato tamy rarybere: –Kakÿnyhe tiire.

<sup>6</sup> Tahe xiwena wedu mahãdu, yrubudÿÿdu mahãdu tuu robireu, ryryrenyre birubunybennyke, itxeò dee bitamadÿÿnyke. Pilato rarybere: –Kaibohole itxeò-di bitamadÿÿnybenyke. Jiarÿ tahe tai ibinamy aõki rahaõhyymahãre.

<sup>7</sup> Tahe judeu mahãdu rarybere: —Jiarỹboho kỹny wabede ywina renydire. Rurukemy heka tuu bedede ywina roireri, tii dori Deuxu Riðremy rex-ininimyhỹre.

<sup>8</sup> Pilato kia-ò roholareu tahe, ruberutyhyre.

<sup>9</sup> Ixityre ralore ywysidỹyna heto-ò: —Rarybere Jesuisi-ò, tiribi wexe tanate. Jesuisi rirawyònyõhyyre.

<sup>10</sup> Tahe Pilato rarybere: —Bidiwarawyònyõkre aõbo. Jiarỹ warurudire anarubunyke aõbo ada arateònyke aõbo.

<sup>11</sup> Jesuisi rirawyònyre: —Aruru-di aõkõ tate. Deuxu kidiwahinykekile tahe biwateònyke ada biwarubunyke. Tai tahe adee wawahidỹỹdu aratyre iðraru dire.

<sup>12</sup> Tai tahe Pilato iteòdỹỹmy rurure. Tahe judeu mahãdu tamy rryre: —Kai biteònykeki tahe, Iòlò Cesar biòwa aõkõ tate.

<sup>13</sup> Kiarybe-ò Pilato roholareu tahe, Jesuisi diòlòdỹỹnyde ahana-ò. Pilato tahe ywisidỹỹna ryna-ò rexisỹnyre. Kia ubeni heka Rirana Ijàti inire. Tahe judeu rybe-ki heka Kabata inire.

<sup>14</sup> Pascoa worana bedehesitxu sexta feira rỹire. Txutye iòhòmy tahe bedede rỹire. Tahe Pilato rarybere judeu mahãdu-ò: —Betehebenyke aiòlòreny-ò.

<sup>15</sup> Tahe tiiboho rryryreny. Bidybenyke! Itxeònihikỹ-ò birubunybenyke. Pilato tahe tamy rarybere: —Aiòlò aõbo, birubunybeny. Tahe xiwena wedu rirawyònyre: —Iny iòlòreny sohojile wa rare: —Cesar heka inire.

<sup>16</sup> Tahe Pilato Jesuisi tamyreny riwahinyre rirubunyrenykemy.

17 Tiiboho heka Jesuisi ridyrenyre. Iitxeò tamy riwahinyre idi retyykremy. Tahe Kalvariu-ò idi ridymy rare. Kalvariu heka Kòkòta inire judeu rybe-ki.

18 Tai itxeò nihikỹ dee ritamadỹnyre ijõ hãbu inatxiõ-wana Jesuisi itxeònihikỹ itya-ki rỹire. Hãbu wiò wiòmý idi rỹire.

19 Pilato riritinyre ritidỹna-ò Jesuisi tyre-ò ritidire. Kawesemy ritidỹna roire: –JESUISI, NAZARE HÃWÃ LUDU, JUDEU MAHÃDU IÒLÒ.

20 Hãwã-ribi ireheriòremy roire. Tai tahe sówemy judeu mahãdu tuu robire iritidỹnamy. Inataõ rybemy witxira riti heka inataõmy roire. Judeu rybe ijõre, latim rybe ijõre, grego rybe ijõre.

21 Judeu xiwena wedu mahãdu Pilato-ò rarybere: –Judeu mahãdu Iòlò rarybere: – Iritidỹõmyke wa. Kawesemy biritinyke: –Tii rarybere judeu mahãdu Iòlò raremy.

22 Tahe Pilato dirawyònyde: –Iwese reritinyre wesemy rarehykre.

23 Soldado Jesuisi itxeònihikỹ-ò ritamadỹnymy rahudi tahe, ityy ritxuatxuakremy diwyde. Inaubiòwa heka riywinyra. Wirarea riwykremy soldado mahãdu idi rỹireri. Iyhyitxena tahe iretydyna-di aõkõ rare.

24 Tahe ijõ widee rarybere: – Iyreyredỹrenyõmyke wa urile ta idi rikihurenkyre mobo ritakremy. Kia ryberiti-ki tuhyy roire:

–Watyy ritxuatxuaare ijõ yre wimy riywinyrenyre. Tule wayhyitxena tyre-ki rehurenyre mobo ritakremy. Tahe iwese Tyyriti rarybere

wese, soldadu mahãdu ibutumy aõhebo risỹnyre.

<sup>25</sup> Inaubiõwa hãwyy retehemy rỹimyhỹ Jesuisi itxeõnihikỹ iõhõmy. Jesuisise taseriõre-wana, Marie Madalena ijõre, Klopa hãwyy ijõre.

<sup>26</sup> Jesuisi tadimy robireu, Joaõ, taerydỹỹna luunadu bire-ki, tahe rarybere: –Nadi beteheke wa kowa ariõre rare.

<sup>27</sup> Tahe Joaõ-õ rarybere: –Kaa adi rare. Ierydỹỹna Joaõ tahe ridyre taheto-õ tai rasỹnykemy.

<sup>28</sup> Jesuisi tahe rieryre ibutumy rexihuramy tahe rarybere: –Ariõkemy watzireri. Kaimy heka rarybere aõbo Ritidỹỹna-ki roire riwinykemy.

<sup>29</sup> Tai tahe vỹi mona silỹnyhỹkỹ-ki raharenyre. Tahe Jesuisi-õ iwereheni wese-õ rituunymy idi riteõnyre iry-õ teõdimy.

<sup>30</sup> Jesuisi tuu riõre idi tahe rarybere: –Ibutumy Waha aõmysỹdỹỹna rexihumy roire. Tahe rõtiorõmy resere iule ta rurure.

<sup>31</sup> Kia sabadotxu heka worana bedehesitxu nihikỹõ rare, brebuna rare. Tai tahe hãbu rubu itxeõ-ki ririkõkemy tuu rarybemyhỹre. Tai Pilato-õ judeu mahãdu rexitõnyre hãbuti riõrõmy riteõnykemy, itxeõ-ribi ritakemy.

<sup>32</sup> Tahe soldado mahãdu hãbuti wiõle riorore.

<sup>33</sup> Jesuisi tahe rurumy roireki iti riõrõõre.

<sup>34</sup> Soldadoõ tahe Jesuisi-ki rojyre iweki tahe hãlubule rohonyre bewana.

<sup>35</sup> Kia tuu rabire tahe õbitimy tuu jiarỹ rarybere, Joaõ wahe. Waritidỹỹna inatyhy raremy, reeryre. Kaiboho bityhynybenykemy, adireny watzireri.

<sup>36</sup> Kaheka ibutumy iritina hetxina tuu rarybere heka ibutumy tuu rotỹỹre. Kia wesemy roire: –Iti

riòròõkre, sohoji aõkõ.

<sup>37</sup> Ijõ iritinaõ kawesemy roire:

—Rirorenykre tõnori-di idi reteherenykre tamy.

<sup>38</sup> Jyje heka Arimatea hãwã luduõ rare. Idi tahe tii Pilato-ò rexitòenyre Jesuisi umyry ritu-unykremy. Tii heka Jesuisi heluduõ rare. Judeu mahãdu lau ruberumyhỹ tai Pilato-ò rare wasimy.

<sup>39</sup> Pilato tahe awiremy rarybere. Tahe Jesuisi umy riwryre. Nikodema tule rare Jyje-wana. Tii juhule rummy Jesuisi-wana widee raryberele rare. Tii òwòrutyby òwòruòbru-wana aderòna wesemy diwyde sòwemy, 45 urihixinamy riutxienanyre.

<sup>40</sup> Tahe Jesuisi umy tyky jurarehe-wana ritỹtenyre aderòna wanahyyle. Kawesemy dori judeu mahãdu iny rituunymyhỹre.

<sup>41</sup> Itxeòalamana-ribi bederaty oworu iòhòmry roire. Ityi-ki tahe wabede tamyra roire. Mana hãloo rỹire tai heka moo rawabedenyõhyre.

<sup>42</sup> Tai tahe rawabedenyre iòhòreki, tule judeu worana bedehesina txummy roireki.

## 20

<sup>1</sup> Semana juhu ludu txu Marie Madalena rehe-mynyre wabede-ò, rudile wahe. Mana ijòtòbòna iraylemy rỹiremy idi retehere.

<sup>2</sup> Tahe rajjaranyre Simaõ Pedro-ò, ijõ Jesuisi luunaduõ wahe, Joaõ-ò, jiarỹle wahe. Tahe wadeereny rarybere: —Wahĩ tahe hãlokowoku-ribi ritakarenryra. Titxibo ritidira, rekerykõre.

<sup>3</sup> Pedro tahe ròhònryre, Joaõ-wana wabede-ò roire.



<sup>4</sup> Wiwana raijaranyre tahe jiarỹ Pedro ratyre raijaranyre tamy. Jiarỹle heka juhu tamy rehemynyre.

<sup>5</sup> Tahe rawebesere iwo-ò itxeremy. Irahanalemy rabire. Ta ralòõhyre tamy.

<sup>6</sup> Idi Pedro rehemynyre ralore tamy. Tule irahanamy robire.

<sup>7</sup> Jesuisi rati rasirahana rihitxinymy roire ixiwanale.

<sup>8</sup> Tahe jiarỹ juhu rehemynyre tahe Pedro hewomy ralore. Tuu robire, retyhynyre.

<sup>9</sup> Tiiboho dori ritina rierynyre ihãre tahe rierytyhykõlerenyre. Jesuisi rubu-ribi rexixix-anykemy ritina roire. Tii tahe rierytyhykõlerenyre. Tahe wiji rierynyra.

<sup>10</sup> Tahe ixyby raõkeserenyre inyhetoren-y-ò.

<sup>11-12</sup> Marie tahe robumy wabede-ribi iòhòm y rỹire. Rawebesere tahe wabedewo-ò itxeremy. Inatxi ýjummy robire iwo-ki itykyuramy roimyhỹ. Ijõ heka rỹmy rononymhỹ Jesuisi ratiherina tyre-ki. Ijõ tahe iwaherina-ki rononymhỹ. Jesuisi umy tahe iõre.

<sup>13</sup> Tahe ýju Marie-ò rỹýraxire: —Hãwyy, aõherekibo tabureri. Rirawyònyre: —Wahĩ kumy dokuri riwumy ramyhỹre. Rekerykõre titxibo ritidira.

<sup>14</sup> Iu rarybereu tahe tahewoòle roosere. Jesuisim y robire rỹimyhỹò. Tii heka rierýõhyymyhỹ tii Jesuisi raremy.

<sup>15</sup> Tahe Jesuisi rỹýraxire: —Hãwyy aõmybo tabuteri, mobo teijeteri. Bederaty oworu ywidỹýdu raremy heka tii rõhõtynyre: —Tahe dirawyònyde: —Wahĩ, kai anobo karibi tetakata-wana wakoku tuu belykyke. Tahe jikarỹ karikorykremy.

16 Tahe Jesuisi tamy ryryre: –Marie! Marie rokesemy reare riijemy: –Wahĩ, erydỹkỹdu! (Tii hebraika rybe tuu rarybere: –Raboni, wahe.)

17 Jesuisi rarybere tamy: –Waroorehedỹỹõmyke wa. Waha-ò dori raõlemy wãhãre tahe arakre. Kai tyhydỹỹdu seriòre-ò makre tamy rybemy. Jesuisi rarybere kawesemy: –Arakre inytybyreny-ò, iny Deuxureny-ò.

18 Idi tahe rarybere erydỹỹna mahãdu-ò Wanyrỹmy rabira. Marie Madalena relyyre timybo raryberamy.

19 Semana juhu ludu txuu, txioromy heka Jesuisi erydỹỹna mahãdu wii ributunymy rỹimyhỹ hetowoõ-ki. Ibutumy ijò ritòbòtòbònyra judeu mahãdu lau brebumy. Jesuisi tahe nade iyreny-ò rexitỹnyre. Rarybere: –Ywina araykywo-ki atxikemy idi watzireri.

20 Kia rarybereu tahe tebò rurena riteòsinyre, tawerurena tule riteòsinyre tamy. Iule tahe reysarenyre Jesusimy robireki wahe.

21 Ixyby tamy Jesuisi rarybere: –Ywina araykywo-ki rarekemy idi watzireri. Iwese Waha diwateònyde wese tule arateònykre.

22 Iu tahe ribunymy rarybere: –Deuxu Tytybytyhy tetateri.

23 Inyòrarunaõ biixãwididỹỹnykeki tule kia òraruna ariixãwidinyke. Tule aõkõkeki, ijõ òraruna biixãwididỹỹnyõkeki, kia tule ariixãwididỹỹnyõke.

24 Tome (Inatxina iniõre) tii waòinatxi reurò mahãduõ rare, tahe tairenyõre heka Jesuisi nadeu.

25 Jesuisi erydỹỹnaõ rarybere: –Wanyrỹmy rabirenyra. Tahe Tome tamyreny rarybere: –

Retyhynyõre kÿnyhe.

<sup>26</sup> Semana sohoji bededÿÿnanamy idi rÿire, ixyby wii ributunyre Jesuisi erydÿÿna mahãdu. Iu tahe Tome tii mahãdu-wana ratximyhÿ. Ijò ritòbòtòbònymy rÿimyhÿ. Tahe Jesuisi nade iyreny-ò. Tamyreny rarybere: –Ywina-di araykywo-ki atxikemy idi watxireri.

<sup>27</sup> Tahe Jesuisi Tome-ò rarybere: –Betehe inihe wadebòrurena-ò ebò inihe tamy bidadidike. Tule wawerurena-ò ebò bidadidike. Itxiõdÿÿõmyke wa, bityhynyke.

<sup>28</sup> Tome tai dirawyònyde: –Wanyrÿ, waDeuxu.

<sup>29</sup> Tahe Jesuisi rarybere: –Tome, kai aõbo bi-watyhynykre wamy tabiterikile. Sõwemy deysana inyõ kanakemy wãhãre tiibohe dori wamy robiõre hãrele riwatyhynyreny.

<sup>30</sup> Jesuisi heka sõwemy aõwiihikÿbo riwinyre. Ierydÿÿna mahãdu heka kia aõmybo robire. Kia aõmydÿÿnana heka ihoõre kaki iritina-ki.

<sup>31</sup> Kaa ritidÿÿna reritinyre Jesuisi Kristumy rare. Deuxu deòdÿÿna rare. Kia bityhynybenykemy wahe, Deuxu Riõre wahe tetyhynyteri-wana tahe umytuedeõna bitakre, ini òraru-ki wahe.

## 21

<sup>1</sup> Iribi tahe Jesuisi rexitÿnynyre Tiberiade ahohokÿ ijà-ki. Kia wesemyre heka.

<sup>2</sup> Ibutumy heka juhu rÿimyhÿ: –Simaõ Pedro, Tome Didimo iniõre, Natanaeli. Tii Kana hãwã ludu rare, Kalileia bede-ki. Zebedeu riõreboho ijõre, inatxi Jesuisi ierydÿÿnaõ ijõre. Rarekie.

<sup>3</sup> Tahe Simaõ Pedro rarybere tamyreny: –Rià teredÿÿmy arakre. Imahãdu rarybere: –Jiarÿboho

aroirenykre ahemy. Tahe roirenyre hãwò-di. Aõhomy aõkõ ruu idireny nade.

<sup>4</sup> Tahe bede ratỹnyrau heki Jesuisi ãnyrakile ratx-imyhỹ. Ierydỹãna mahãdu tahe rieryõhyymyhỹre.

<sup>5</sup> Jesuisi ryryre tamyreny rỹãraxire: —Ijoi moõ rokoreny. Utura aõbo temytenyta? Rirawyònyre: —Aõkõre wa.

<sup>6</sup> Kaiboho biterebenyke rurunawe-ribi taita bimibenykre. Tahe riterenyre sõwemy rautx-ienyre iriã heka ritusinyõhyymyhỹrenyre utura sõwerekì.

<sup>7</sup> Kia ierydỹãnaõ Jesuisi luunaduõ rare jiarỹ, Joaõ wahe. Jiarỹ tahe Pedro-ò rarybere: —Inynyrỹle wa rare. Pedro Jesuisi raramy roholareu, tatyky tawetyamy ritaamy tamy resere, tade hekỹlemy rareki. Tahe resere bera-txi tamy rakremy.

<sup>8</sup> Ijoi mahãdu riã-di narurunymy nade utura sõwerekì. Tahe 100 urihixinamy ãnyra-ribi ratx-imyhỹreny.

<sup>9</sup> ãnyra-ò rejuxunyreu tahe, robirenyre heòtymy obiurawo-ki. Orotxu tule tai rỹire.

<sup>10</sup> Jesuisi tamy rarybere: —Uturaõ bidiwybedenyke wiji temytenytaõ. Simaõ Pedro hãworibile riã-di rarurunyre. Sõwemy heka tai utura nihikỹ rỹimyhỹ, 153 wahe. Ihãre tahe riã raòròõhyyre.

<sup>11</sup> Tahe Jesuisi rarybere: —Manake hewa biroxi-benyke.

<sup>12</sup> Ibutumy ierydỹãna mahãdu rieryre tii inynyrỹreny raremy. Tai tahe inyõ rỹãraxiõhyyre: —Mobo tii raremy.

<sup>13</sup> Tahe Jesuisi orotxu rimyre. Tamy riwahinyre.

Ixiyrubule utura tamy riwahinyre.

<sup>14</sup> Kia tahe ihewotyhymy Jesuisi rexideòsinyre taerydỹna mahãdu-ò, rubu-ribi dexixade hewomy wahe.

<sup>15</sup> Riroximy rahudi tahe Jesuisi Pedro-ò rỹrãxire: –Simaõ, Joaõ riòre, kahãbu mahãdu waluure. Kai tahe iratyre aõbo waluure. Tii rirawyònyre: –Kai tiwaeryte, aluure. Tahe Jesuisi rarybere: –Wabudoeni riòre bidiòwenyke.

<sup>16</sup> Ixityre rỹrãxire: –Simaõ, Joaõ riòre, kai aõbo waluure. Tahe Pedro rirawyònyre: –Kohe, Wanyrỹ aluure jiarỹ, tiwaeryta. Tahe Jesuisi rarybere: –Bidyke wabudoeni biòwenykemy.

<sup>17</sup> Ihewotyhymy tahe Jesuisi rỹrãxire: –Simaõ, Joaõ riòre, kai aõbo waluure. Iu tahe Pedro rabe-dewomy ronyre, ixityremy rỹrãxireki. Tahe dirawyònyde: –Wanyrỹ, ibutumy teeryte aõna aõna. Aluure heka, tiwaeryta. Tahe Jesuisi rarybere: Wabudoeni biòwenyke.

<sup>18</sup> Inatyhymy adee ararybekre. Iu ijoi morõkõmy tatemahãu, ixiwanale texityynmahãte ixidee wimy titxibo tamahãte. Iu tahe mamatuarinykre inywitxira aratyynykre, Ebò biteòsinykre iny arataataanykre tahe inyõ aradykre titxibo noderamy beakreò.

<sup>19</sup> Kiamy heka Jesuisi rarybere ritỹnynykremy timybo Pedro rubu-ò rỹikremy. Tai Deuxu riwowydynykre. Idi tahe Jesuisi rarybere: –Biwaheludunyke wa.

<sup>20</sup> Tahe Pedro retehere Joaõ Jesuisi hemy rareriò, Joaõ Jesuisi luummy raremyhỹ. Joaõ ihetxiu Jesuisi-ò iòhòmỹ rỹrãxire jiarỹ wahe: –Mobo

iwahisidỹỹdukremy, ihewo ludu roxina rỹireu.

<sup>21</sup> Tahe Pedro Joaõmy robireu, rỹỹraxire Jesuisi-ò Joaõmy. Aõbo he tamy rotỹỹnykre.

<sup>22</sup> Tahe Jesuisi rirawyõnyre: –Tii rurukõlemy adòòsekemy idi watzikeki, timybo tahõtinyte. Adee tahe biwaheludunykekile awike.

<sup>23</sup> Ierydỹỹna mahãdu rarybemy raremyhỹ: – Kiamy wahe Joaõ rurukõlemy Jesuisi rarybere. Tahe kiamy aõkõ Jesuisi rarybere. Jesuisi juhuu rarybere: –Tii rurukõòle adoosekre-wana, timybo tahõtinytenyteri.

<sup>24</sup> Jiarỹ tahe kia aõmydỹỹnanamy relymahãre, Joaõ wahe, reritinyahãre. Inatyhymy kia tuu rare, jiarỹ tuu relymahãre.

<sup>25</sup> Sõwemy aõmydỹỹnanamy tahe Jesuisi riwinyre. Inyõ ibutumy riritinykeki, iritina heka bede ritỹxinykre tyyriti sõwekre-wana.

## **Deuxu Rybe Tyyriti** **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 18 Apr 2025 from source files  
dated 29 Jan 2022

55ce0bcd-101e-52a3-984e-847027efe150